



Vertical text on the right side of the page, likely a title or page number, written in a traditional Chinese style. The text is partially obscured by the binding and is difficult to read clearly.

水經注釋卷八

仁和趙一清誠夫錄

濟水二

濟水又東至乘氏縣西分為二

春秋左傳僖公三十一年分曹地東傳于濟濟水自是

東北流出巨澤

其一水東南流其一水從縣東北流入鉅野澤

南為菏水北為濟瀆

過乘氏縣與濮渠合

北濟自濟陽縣北東北逕煮棗城南郡國志曰冤胸縣

有煮棗城即此也漢高祖十二年封革朱為侯國北濟
 又東北逕冤胸縣故城北又東北逕呂都縣故城南王
 莽更名之曰祁都也又東北逕定陶縣故城北漢景帝
 以濟水出其北東流中六年分梁于定陶置濟陰郡
 按濟陰郡當作濟陰國考漢書諸侯王表景帝以中六
 年封梁孝王子不識為濟陰王始有濟陰之稱故地理
 志云濟陰郡故梁景帝六年別為濟陰國不識立二年
 而薨無後則是國已除矣其時或仍屬于梁或立為郡
 志不之詳也又云宣帝甘露二年更名定陶是又為王
 國矣其時以封皇子躡後徙王楚迨元帝永光八年徙
 皇子山陽王康為定陶王是為共王王子欣即哀帝既
 入繼大統立楚思王子景為定陶王奉共王後二年徙
 景王信都如淳曰不復為定陶王立後者哀帝自以已
 為後故哀帝崩無後徵立中山孝王之子衍為帝是為
 平帝其時王莽擅權與傅丁為仇之際定陶國之廢必
 在斯時故續志云濟陰郡治定陶劉昭補註惟以郡故

梁景帝分置為言而其顛末亦不暇詳也獨怪班固既
 詳建國之始乃遺立郡之由不幾犯張冠李戴方鑿圓
 柄之誦耶道元亦指為一清按為濟而定名也又東北
 因仍書之誤矣

與濮水會上承濟水於封邱縣即地理志所謂濮渠水
 首受濟者也闕駟曰首受別濟即北濟也其故瀆自濟
 東北流左迤為高粱陂方三里濮水又東逕匡城北孔
 子去衛適陳遇難于匡者也又東北左會別濮水受河
 於酸棗縣故杜預云濮水出酸棗縣首受河竹書紀年
 曰魏襄王十年十月大霖雨疾風河水溢酸棗郛漢世
 塞之故班固云文堙棗野也今無水其故瀆東北逕南
 北二棗城間左傳襄公五年楚子囊伐陳公會于城棗

以救之者也濮渠又東北逕酸棗縣故城南韓國矣圈稱曰昔天子建國名都或以令名或以山林故豫章以樹氏郡酸棗以棘名邦故曰酸棗也漢官儀曰舊河隄謁者居之城西有韓王望氣臺孫子荆故臺賦敘曰酸棗寺門外夾道左右有兩故臺訪之國老云韓王聽訟觀臺高十五仞雖樓榭泯滅然廣基似于山岳召公大賢猶舍甘棠區區小國而臺觀隆崇驕盈于世以鑒來今故作賦曰蕞邱陵之邈迤亞五嶽之嵯峨言壯觀也城北韓之市地也聶政為濮陽嚴仲子刺韓相俠累遂皮面而死其姊哭之于此城內有後漢酸棗令劉孟陽

碑

一清按孟陽名熊見趙明誠金石錄跋尾

濮水北稱成陂

一清按此處有脫誤

陂方

五里號曰同池陂又東逕胙亭東注故胙國也富辰所

謂邢茅胙祭周公之肩也濮渠又東北逕燕城南故南

燕姑姓之國也有北燕故以南氏縣東為陽清湖陂南

北五里東西三十里亦曰燕城湖逕桃城南即戰國策

所謂酸棗虛桃者也漢高帝十二年封劉襄為侯國全氏

日孫汝澄云劉襄所封之桃在信都道元于濁漳水篇已證之誤複于此而東注于濮俗謂

之朝平溝濮渠又東北又與酸水故瀆會酸瀆首受河

於酸棗縣東逕酸棗城北延津南謂之酸水竹書紀年

曰秦蘇胡率師伐鄭韓襄敗秦蘇胡于酸水者也酸瀆

水又東北逕燕城北又東逕滑臺城南又東南逕瓦亭南春秋定公八年公會晉師于瓦魯尚執羔自是會始也又東南會於濮世謂之百尺溝濮渠之側有漆城竹書紀年梁惠成王十六年邯鄲伐衛取漆富邱城之者也或亦謂之宛濮亭春秋甯武子與衛人盟于宛濮杜預曰長垣西南近濮水也京相璠曰衛地也似非關究而不知其所竹書紀年梁惠成王五年公子景賈率師伐鄭韓明戰于陽我師敗逋澤北有壇陵亭亦或謂之大陵城非所究也又有桂城竹書紀年梁惠成王十七年齊田期伐我東鄙戰于桂陽我師敗逋亦曰桂陵案

史記齊威王使田忌擊魏敗之桂陵齊于是疆自稱為王以令天下濮渠又東逕蒲城北故衛之蒲邑孔子將之衛子路出迎于蒲者也韓子曰魯以仲夏起長溝子路為蒲宰以私粟饋衆孔子使子貢毀其器焉余案家語言仲由為蒲宰脩溝瀆與之簞食瓢飲夫子令賜止之無魯字全氏曰韓非子本言子路為邱宰故屬之魯道元既誤引而又贅辨之不然俗本誤邱為蒲又入其境三稱其善身為大夫終死衛難濮渠又東逕韋城南即白馬縣之韋鄉也史遷記曰夏伯豕韋之故國矣城西出而不方城中有六大井皆隧道下俗謂之江井也有馳道自城屬于長垣濮渠東絕馳道東

逕長垣縣故城北衛地也故首垣矣秦更從今名王莽
 改爲長固縣陳畱風俗傳曰縣有防垣故縣氏之孝安
 帝以建光元年封元舅宋俊爲侯國縣有祭城濮渠逕
 其北鄭大夫祭仲之邑也杜預曰陳畱長垣縣東北有
 祭城者也圈稱又言長垣縣有羅亭故長羅縣也漢封
 後將軍常惠爲侯國地理志曰王莽更長羅爲惠澤後
 漢省并長垣有長羅澤卽吳季英牧豬處也又有長羅
 畱蘧伯玉畱陳畱風俗傳曰長垣縣有蘧伯鄉一名新
 鄉有蘧亭伯玉祠伯玉冢曹大家東征賦曰到長垣之
 境界兮察農野之居民覩蒲城之邱墟兮生荆棘之藁

藁蘧氏在城之東南兮民亦饗其邱墳唯令德之不朽

兮身旣沒而名存昔吳季札聘上國至衛觀典府賓亭

父疇以衛多君子也

朱氏謀璋箋曰左傳云延陵季子去鄭適衛說蘧伯玉史狗史鮑公

子荆公子發公子朝此云觀典府賓亭父疇未詳

濮渠又東分爲二瀆北濮出

焉濮渠又東逕須城北衛詩云思須與曹也毛云須衛

邑矣鄭云自衛而東逕邑故思濮渠又北逕襄邱亭南

竹書紀年曰襄王七年韓明率師伐襄邱九年楚庶章

率師來會我次于襄邱者也濮水又東逕濮陽縣故城

南昔師延爲紂作靡靡之樂武王伐紂師延東走自投

濮水而死矣後衛靈公將之晉而設舍于濮水之上夜

聞新聲召師涓受之于是水也濮水又東逕濟陰離狐
 縣故城南王莽之所謂瑞狐也郡國志曰故屬東郡濮
 水又東逕葭密縣故城北竹書紀年元公三年魯季孫
 會晉幽公于楚邱取葭密遂城之一清按此文本作幽王十三年魯季孫會
 晉文公于楚邱即葭密遂城之朱氏謀璋箋云幽王舊
 本作幽公十三年宋本無十字今本竹書紀年周考王
 十四年魯季孫會晉幽公于楚邱無即葭密遂城之六
 字寰宇記曹州乘氏縣下云竹書紀年幽公十三年季
 孫會晉文公于楚取葭密遂城之則知古本竹書如是
 然而有大可疑者史記六國年表周考王元年歲辛丑
 十四年甲寅當魯元公嘉之二年晉幽公柳之十年而
 魯世家注徐廣曰皇甫謐云元公元年辛亥終辛未得
 二十一年與世表參校差二歲此云三年又差一歲
 志曰濟陰乘氏縣有鹿城鄉春秋僖公二十一年盟于

鹿上京杜竝謂此亭也濮水又東與句瀆會首受濮水
 枝渠於句陽縣東南逕句陽縣故城南春秋之穀邱也
 左傳以為句瀆之邱矣縣處其陽故縣氏焉又東入乘
 氏縣左會濮水與濟同入鉅野故地理志曰濮水自濮
 陽南入鉅野一清按此是應劭說非班固元文亦經所謂濟水自乘氏
 縣兩分東北入於鉅野也濟水故瀆又北右合洪水水
 上承鉅野薛訓渚歷澤西北又北逕闕鄉城西春秋桓
 公十有一年經書公會宋公于闕郡國志曰東平陸有
 闕亭皇覽曰蚩尤冢在東郡壽張縣闕鄉城中冢高七
 尺常十月祠之有赤氣出如絳民名為蚩尤旗十三州

志曰壽張有蚩尤祠

漢志東郡壽良縣蚩尤祠在西北沛上

又北與濟瀆

合自渚迄於北口一百二十里名曰洪水桓溫以太和四年率衆北入掘渠通濟至義熙十三年劉武帝西入長安又廣其功自洪口已上又謂之桓公瀆濟自是北注也春秋莊公十八年經書夏公追戎于濟西京相璠曰濟水自鉅野至濟北是也

又東北過壽張縣西界安民亭南汶水從東北來注之濟水又北汶水注之戴延之所謂清口也郭緣生述征記曰清河首受洪水北流入濟或謂清即濟也禹貢濟東北會於汶今枯渠注巨澤巨澤北則清口清水與汶

會也李欽曰汶水出太山萊蕪縣西南入濟是也濟水又北逕梁山東袁宏北征賦曰背梁山截汶波即此處也劉澄之引是山以證梁父為不近情矣山之西南有呂仲悌墓河東岸有石橋橋本當河河移故側岸也古老言此橋東海呂母起兵所造也山北三里有呂母宅宅東三里即濟水濟水又北逕須胸城西城臨側濟水故須胸國風姓也春秋僖公二十一年子魚曰朱氏謀此三字宜刪一清按三字是酈氏誤引傳文任宿須胸顓臾風姓也實司太皞與有濟之祀杜預曰須胸在須昌縣西北非也地理志曰壽張縣西北有胸城者是也濟水西有安民亭亭

北對安民山東臨濟水水東即無鹽縣界也山西有冀

州刺史王紛碑漢中平四年立趙氏明誠金石錄跋尾曰冀州刺史王純碑延

熹四年立桑欽水經云濟水逕須句城西酈道元注濟

水西有安民山山西有冀州刺史王紛碑漢中平四年

立按地理書須句即今中都縣此碑在中都又其官與

姓氏皆合疑其是也然以純為紛以延熹為中平則疑

水經之誤葉氏奕苞續金石錄曰漢冀州刺史王純碑

云君諱純字伯敦年五十九延熹四年八月廿八日甲

寅隕殂五年十一月十八日丙申葬而立此碑也按水

經王紛碑立于中平四年去延熹已二十餘年或別有

王紛非王純也且隸書純紛二字絕不類而此碑純字

完好更無殘泐若趙氏所云乃好奇之過君子于其所

不知蓋濟水又北逕微鄉東春秋莊公二十八年經書

冬築郿京相璠曰公羊傳謂之微在東平壽張縣西北

三十里有故微鄉魯邑也杜預曰有微子冢濟水又北

分為二水其枝津西北出焉謂之馬頰水者也

又北過須昌縣西

京相璠曰須胸一國二城兩名蓋遷都須昌胸是其本

秦以為縣漢高帝十一年封趙衍為侯國濟水於縣趙

溝水注之濟水又北逕魚山東左合馬頰水水首受濟

西北流歷安民山北又西流趙溝出焉東北注於濟馬

頰水又逕桃城東春秋桓公十年經書公會衛侯于桃

邱衛地也杜預曰濟北東阿縣東南有桃城即桃邱矣

馬頰水又東北流逕魚山南山即吾山也漢武帝瓠子

歌所謂吾山平者也山上有柳舒城魏東阿王曹子建

每登之有終焉之志及其終也葬山西西去東阿城四十里其水又東注於濟謂之馬頰口也濟水自魚山北逕清亭東春秋隱公四年公及宋公遇于清者也京相璠曰今濟北東阿東北四十里有故清亭即春秋所謂清者也是下濟水通得清之目焉亦水色清深用兼厥稱矣是故燕王曰吾聞齊有清濟濁河以為固即此水也又北過穀城縣西

濟水側岸有尹卯壘南去魚山四十餘里是穀城縣界故春秋之小穀城也齊桓公以魯莊公二十三年城之邑管仲焉城內有夷吾井魏土地記曰縣有穀城山山

出文石陽穀之地春秋齊侯宋公會于陽穀者也縣有

黃山臺黃石公與張子房期處也又有狼水出東南大

檻山狼溪西北逕穀城西又北有西流泉出城東近山

西北逕穀城北西注狼水以其流西故即名焉趙秉文

雙溪記東平黃山之下曰浪溪酈道元水經注所謂狼溪者是也狼浪同聲因以名之浪溪東二十里而近有佛屋溪源于此築堰匯水為溪溪廣百畝上納天光下侵山根中植亭館蒔以花竹命之曰雲溪一清按雲溪似即注中所謂西流泉也又西北入清水城西北三里有項王羽之

冢半許毀壞石碣尚存題云項王之墓皇覽云冢去縣

十五里謬也今彭城穀陽城西南又有項羽冢非也余

按史遷記魯為楚守漢王示羽首魯乃降遂以魯公禮

葬羽于穀城寧得言彼也濟水又北逕周首亭西春秋文公十有一年左邱明云襄公二年王子成父獲長狄僑如弟榮如埋其首于周首之北門卽是邑也今世謂之盧子城濟北郡治也京相璠曰今濟北所治盧子城故齊周首邑也

又北過臨邑縣東

地理志曰縣有濟水祠也王莽之穀城亭也水有石門以石爲之故濟水之門也春秋隱公三年齊鄭會于石門鄭車僨濟卽于此也京相璠曰石門齊地今濟北盧縣故城西南六十里有故石門去水三百步蓋水瀆流

移故側岸也濟水又北逕平陰城西春秋襄公十八年晉侯沈玉濟河會于魯濟尋溴梁之盟同伐齊齊侯禦諸平陰者也杜預曰城在盧縣故城東北非也京相璠曰平陰齊地也在濟北盧縣故城西南十里平陰城南有長城東至海西至濟河道所由名防門去平陰三里齊侯塹防門卽此也其水引濟故瀆尙存今防門北有

光里齊人言廣音與光同全氏祖望曰卽春秋所謂守

之廣里者也何氏曰杜氏以爲防門之塹其廣一里耳善長則以廣爲里名全氏曰杜說是也酈

以聲音之變爲證非矣又云巫山在平陰東北昔齊侯登望晉軍

畏衆而歸師曠邢伯聞烏鳥之聲知齊師潛遁人物咸

淪地理昭著賢于杜氏東北之證矣今巫山之上石
 室耆老言郭巨葬母處世謂之孝子堂濟水右迤為湄
 湖方四十餘里濟水又東北逕垣苗城西故洛當城也
 伏韜北征記曰濟水又與清河合流至洛當者也宋武
 帝西征長安令垣遵鎮此故俗人有垣苗城之稱按一清
 遵垣苗伯仲並為劉武帝參軍從征長安豈可兄鎮此
 城弟襲其號乎且一城亦未必二人居守而城有垣苗
 之稱則垣遵為誤引也又按通鑑宋紀孝武大明三年
 以義陽太守垣閻為兗州刺史閻遵之子也胡三省注
 曰垣遵即垣苗也武帝西征長安使遵守洛當城城據
 河濟之會人謂之垣苗城此是全襲酈注之誤忘卻晉
 安帝義熙五年劉裕伐慕容超超尚書略陽垣遵及弟
 京兆太守垣苗踰城來降之文遵乃苗之兄不審梅磧
 何以失爾檢乃爾河水自四瀆口東北流而為清魏土地記曰盟

津河別流十里與清水合亂流而東逕洛當城北黑白
 異流涇渭殊別而東南流注也

又東北過盧縣北

濟水東北與湄溝合水上承湄湖北流注濟爾雅曰水
 草交曰湄通谷者微犍為舍人曰水中有草木交合也

郭景純曰微水邊通谷也釋名曰湄眉也臨水如眉臨
 目也一作清按魏書慕容白曜傳濟水又逕盧縣故城北

濟北郡治也漢和帝永元二年分泰山置蓋以濟水在
 北故也濟水又逕什城北城際水湄故邸閣也祝阿人
 孫什將家居之以避時難因謂之什城焉濟水又東北

與中川水合水東南出山在縣之分水嶺溪一源兩分
 泉流半解亦謂之分流交半水南出太山入汶半水出
 山在縣西北流逕東太原郡南郡治山在西北與賓溪
 谷水合水出南格馬山賓溪谷北逕盧縣故城北陳敦
 成南西北流與中川水合謂之格馬口其水又北逕盧
 縣故城東而北流入濟俗謂之為沙溝水濟水又東北
 右會玉水水導源太山朗公谷舊名琨瑞溪有沙門竺
 僧朗少事佛圖澄碩學淵通九明氣緯隱于此谷因謂
 之朗公谷故車頻秦書云苻堅時沙門竺僧朗嘗從隱
 士張巨和遊巨和嘗穴居而朗居琨瑞山大起殿舍連

樓纍閣雖素飾不同竝以靜外致稱卽此谷也水亦謂
 之琨瑞水也其水西北流逕玉符山又曰玉水又西北
 逕獵山東又西北枕祝阿縣故城東野井亭西春秋昭
 公二十五年經書齊侯唁公于野井是也春秋襄公十
 九年諸侯盟于祝柯左傳所謂督陽者也漢興改之曰
 阿矣漢高帝十一年封高邑為侯國王莽之安成者也
 故俗謂是水為祝阿澗水北流注於濟建武五年耿弇
 東擊張步從朝陽橋濟渡兵一清按後漢書耿弇傳東
云朝城在濟水北有漯河酈從朝陽橋河以度章懷註
氏以濟渡連稱詞義乖舛卽是處也濟水又東北灤
 水出焉灤水出歷城縣故城西南泉源上奮水涌若輪

春秋桓公十八年公會齊侯于灤是也俗謂之爲娥姜水也以泉源有舜妃娥英廟故也城南對山山上有舜祠山下有大穴謂之舜井抑亦茅山禹井之比矣書舜耕歷山亦云在此所未詳也其水北爲大明湖西卽大明寺寺東北兩面側湖此水便成淨池也池上有客亭左右楸桐負日俯仰目對魚鳥極水木明瑟可謂濠梁之性物我無違矣湖水引瀆東入西郭東至歷城西而側城北注湖水上承東城歷祠下泉源競發其水北流逕歷城東又北引水爲流杯池州僚賓燕公私多萃其上分爲二水右水北出左水西逕歷城北西北爲陂謂

之歷水與灤水枝津合水首受歷水於歷城東東北逕東城西而北出郭又北注灤水又北聽水出焉灤水又北流注于濟謂之灤口也濟水又東北逕華不注山單椒秀澤不連邱陵以自高虎牙桀立孤峯特拔以刺天青崖翠發望同點黛山下有華泉故京相璠春秋土地名曰華泉華不注山下泉水也春秋左傳成公二年齊頃公與晉卻克戰于鞏齊師敗績逐之三周華不注逢丑父與公易位將及華泉驂絙于木而止丑父使公下如華泉取飲齊侯以免韓厥獻丑父卻子將戮之呼曰自今無有代其君任患者有一于此將爲戮矣卻子曰

人不難以死免其君我戮之不祥赦之以勸事君者乃免之即華水也北絕聽瀆二十里注於濟

又東北過臺縣北

巨合水南出雞山西北北逕巨合故城西耿弇之討張步也守巨里即此城也三面有城西有深坑坑西即弇所營也與費邑戰斬邑于此巨合水又北合關盧水關盧水導源馬耳山北逕博亭城西西北流至平陵城與武原水合水出譚城南平澤中世謂之武原泉北逕譚城東俗謂之古城也又北逕東平陵縣故城西故陵城也後乃加平譚國也齊桓之出過譚譚不禮焉魯莊公

九年即位又不朝十年滅之城東門外有樂安任照先

碑一清按名勝志引此注云城東有漢相劉衡碑又有樂安任照先碑今本無劉衡碑之目蓋有脫失矣

濟南郡治也漢文帝十六年置為王國景帝二年為郡

王莽更名樂安其水又北逕巨合城東漢武帝以封城

陽頃王子劉發于為侯國沈氏曰史漢表俱無于字又按漢表云平原索隱亦云皆

為誤也後漢書章懷註云巨里聚一名巨合城其水合

關盧水西出注巨合水西北逕臺縣故城南漢高帝六

年封東郡尉戴野為侯國王莽之臺治也一清按高祖功臣表臺定

侯戴野日知錄漢書濟南郡之縣十四一日東平陵二

日鄒平三曰臺四曰梁鄒後漢書濟南郡十城其一曰東平陵其四曰臺其七日梁鄒其八曰鄒平後人讀漢書誤從鄒字絕句因以鄒為一縣平臺為一縣齊乘遂

謂漢濟南郡後漢改為鄒平又以臺平臺為二縣此不得其句讀而妄為之說也漢志常山郡有平臺縣是史子叔封邑亭林之說是也其水西北流白野泉水注之水出臺城西

南白野泉北逕畱山西北流而右注巨合水又北聽水

注之水上承灤水東流北屈又東北流注於巨合水亂

流又北入於濟濟水又東北合芹溝水水出臺縣故城

東南西北流逕臺城東又西北入於濟水

又東北過營縣南

濟水東逕營縣故城南漢景帝二年封齊悼惠王子罷

軍為侯國全氏曰于欽云管史漢表皆誤為管故右納

百脈水百脈水出土鼓縣故城西水源方百步百泉俱

出故謂之百脈水其水西北流逕陽邱縣故城中漢孝

景帝四年以封齊悼惠王子劉安為陽邱侯一清按漢表陽邱侯

安以文帝四年封而史表無之史表有瓜邱侯寧國索

隱曰縣在魏郡地理志魏郡無瓜邱則斥邱之誤也漢

表云氏邱侯甯國氏邱亦斥邱之譌又按氏邱侯封十

一年而薨十五年侯偃嗣十年為景帝三年反誅楊邱

侯封十二年而薨十六年侯偃嗣十一年為景帝四年

坐出國界耐為司寇嗣侯名為偃其封薨與嗣總差一

年一似氏邱之即楊邱者未知史世謂之章邱城非也

城南有女郎山山上有神祠俗謂之女郎祠左右民祀

焉其水西北出城北逕黃巾固蓋賊所屯故固得名焉

百脈水又東北流注於濟濟水東又有楊渚溝水水出

東又北逕甯戚城西北流注於濟水也

又東過梁鄒縣北

隴水南出長城中北流至般陽縣故城西南與般水會
水出縣東南龍山俗亦謂之為左阜水西北逕其城南
王莽之濟南亭也應劭曰縣在般水之陽縣資名焉其
水又南屈西入隴水北逕其縣西北流至萌水口萌水
出西南甲山東北逕萌山西東北入於隴水隴水又西
北至梁鄒東南與魚子溝水合水南出長白山東柳泉
口山即陳仲子夫妻之所隱也孟子曰仲子齊國之世
家兄戴祿萬鍾仲子非而不食避兄離母家于於陵即

此處也其水又逕於陵縣故城西王莽之於陸也世祖

建武十五年更封則鄉侯侯霸為侯國一清按後漢書

三年薨帝親自臨弔下詔追封諡則鄉侯侯何緣有十
五年更封之事本傳又云子昱嗣昱後徙封於陵侯是
霸之子非霸也善長誤矣其水北流注于隴水隴水即古袁水也故

京相璠曰濟南梁鄒縣有袁水者也隴水又西北逕梁

鄒縣故城南又北屈逕其城西漢高祖六年封武虎為

侯國一清按史表作武儒此從漢表其水北注濟其城之東北又有時

水西北注焉

又東北過臨濟縣南

縣故狄邑也王莽更名利居漢記安帝永初二年改從

今名以臨濟故地理風俗記云古樂安太守治晏謨齊記曰有南北二城隔濟水南城即被陽縣之故城也北

枕濟水地理志曰侯國也如淳曰音罷軍之罷也按漢

志注如淳曰一作疲史表作披索史記建元以來王子隱曰蕭該披音皮劉氏音皮彼反

侯者年表曰漢武帝元朔四年封齊孝王子敬侯劉燕

之國也今渤海僑郡治濟水又東北迤為淵渚謂之平

州坑濕沃縣側有平安故城俗謂之會城非也一清按

云伏琛曰千乘城在齊城西北一百五十里隔會水即

漂水之別名故漂沃縣側之城俗謂之會城也以此

按地理志千乘郡有平安縣侯國也全氏曰地理志有

以平安封者蓋失之一清按孝成許皇后傳后姊子平

安剛侯謁則是平安之封邑可知但侯表中無之耳

王莽曰鴻睦也應劭曰博昌縣西南三十里有平安亭

故縣也世尚存平州之名矣濟水又東北逕高昌縣故

城西案地理志曰千乘郡有高昌縣漢宣帝地節四年

封董忠為侯國世謂之馬昌城非也濟水又東北逕樂

安縣故城南伏琛齊記曰博昌城西北五十里有南北

二城相去三十里隔時濟二水指此為博昌北城非也

樂安與博昌薄姑分水俱同西北薄姑去齊城六十里

樂安越水差遠驗非尤明班固曰千乘郡有樂安縣應

劭曰取休令之名矣漢武帝元朔五年封李蔡為侯國

全氏曰按漢表李蔡封安樂是邳邠之昌縣非千乘之

樂安也史表作樂安而索隱曰表在昌可證也一清按

全說非也李蔡封樂安侯史漢李廣傳功臣表衛青傳及百官公卿表凡七見惟漢書功臣表作安樂耳故師古以表為誤蓋封在樂安而食邑于昌亦或是博昌與樂安同屬千乘并非瑯邪之昌轉寫者脫失耳禹貢錐指曰樂安故城在今博興縣東隋改樂安曰博昌五代唐曰博興元和志博昌縣清水在北去縣百步按此經舊在高昌下今據薄姑利縣俱南直臨淄而樂安故城在博昌縣東北則此經乃錯簡故移于利縣之後甲下邑之前一清按東樵不知此條是注所謂先城西三里經起事乃有錯簡之疑即實非也今仍其舊

有任光等冢光是宛縣人不得為博昌明矣濟水又逕薄姑城北後漢郡國志曰博昌縣有薄姑城地理志曰呂尚封于齊郡薄姑薄姑故城在臨淄縣西北五十里近濟水史遷曰胡公徙薄姑一清按齊世家是獻公城內有高臺春秋昭公二十年齊景公飲于臺上曰古而不死何樂

如之晏平仲對曰昔爽鳩氏始居之季荊因之有逢伯陵因之薄姑氏又因之而後太公又因之臣以為古若不死爽鳩氏之樂非君之樂即于是臺也濟水又東北逕狼牙固西而東北流也

又東北過利縣西

地理志曰齊郡有利縣王莽之利治也晏謨曰縣在齊城北五十里

又東北過甲下邑入於河

濟水東北至甲下邑南東歷琅槐縣故城北地理風俗記曰博昌東北八十里有琅槐鄉故縣也山海經曰濟

水絕鉅野注渤海入齊琅槐東北者也又東北河水枝
津注之水經以為入河非也斯乃河水注濟非濟入河
又東北入海

郭景純曰濟自滎陽至樂安博昌入海今河竭濟水仍
流不絕經言入河二說竝失然河水於濟潔之北別流
注海今所綴流者惟漯水耳郭或以為濟注之事實非
也尋經脈水不如山經之為密矣

其一水東流者過乘氏縣南

荷水分濟於定陶東北

一清按漢志濟陰郡下云禹貢
荷澤在定陶東傳寅尚書集解
云許氏說文荷水出山陽湖陵南正與孔傳同而班固
以為在定陶何也蓋在定陶者其澤也在湖陵者其流

也其流與泗合正在單州之魚臺魚臺在單州東北百
里而近正古湖陵地也而孟豬在睢陽東北則所謂被
孟豬者導荷流之在定陶
魚臺閒者以被之于南也
東南右合黃溝枝流俗謂之

界溝也北逕己氏縣故城西又北逕景山東衛詩所謂

景山與京者也毛公曰景山大山也

全氏曰按此非衛
詩之景山歐陽忞

輿地廣記曰今拱州楚邱非衛之
所遷縣有景山京岡皆後人附會又北逕楚邱城西郡

國志曰成武縣有楚邱亭杜預云楚邱在成武縣西南
衛懿公為狄所滅衛文公東徙渡河野處曹邑齊桓公

城楚邱以遷之故春秋稱邶遷如歸衛國忘亡即詩所

謂升彼墟矣以望楚矣望楚與堂景山與京故鄭元言

觀其旁邑及山川也

程氏公說春秋分記曰戎州己氏
邑在今拱州楚邱縣戎蓋昆吾之

後別在夷狄周衰入于此天王使凡伯聘魯由雒邑道
 楚邱至仙源逮其歸戎乃要而伐之楚邱在河南宜為
 周魯往來之地以其逼近宋都故在二漢晉屬梁國杜
 誤以此為即僖二年衛所城之邑于隱七年釋云在濟
 陰城武縣于僖二年城楚邱則釋云衛邑是以城楚邱
 為前日戎伐王使之楚邱矣水經亦以戎伐凡伯于楚
 邱為衛文公徙居于此按濟陰城武縣即今開德之衛
 南蓋隋大業初改從此名謂梁郡有楚邱縣故以別之
 衛為狄所滅東徙渡河野處曹邑文公徙居楚邱曹邑
 在今滑之白馬衛南為近二邑不出邦域之中斯文公
 所由徙也又衛南之楚邱在河北凡伯安有踰河北道
 衛南而使于魯耶故衛南之楚邱為衛所城之邑而拱
 州之楚邱則戎州已氏邑云顧氏炎武曰知錄曰春秋
 隱公七年戎伐凡伯于楚邱以歸杜氏曰楚邱衛地在
 濟陰城武縣西南夫濟陰之城武此曹地也而言衛非
 也蓋與僖公二年城楚邱同名而誤按衛國之封本在
 汲郡朝歌懿公為狄所滅渡河而東立戴公以廬于漕
 杜氏曰曹衛下邑詩所謂思須與曹廬者無城郭之稱
 而非曹國之曹也僖公二年城楚邱杜氏曰楚邱衛邑
 詩所謂作于楚宮而非戎伐凡伯之楚邱也但云衛邑

而不詳其地然必在滑縣開州之間滑在河東故唐人
 有魏滑分河之錄矣水經注乃曰楚邱在成武西南即
 衛文公所徙誤矣彼曹國之地齊桓安得取之而封衛
 乎以曹名同楚邱之名又同遂為一爾一清按亭林之
 見與克齋合前輩立說大氏必有依仿克齋遂于春秋
 之學本史記體制撰分記九十卷疆理書尤稱詳覈然
 謂濟陰城武縣即開德之衛南誤也濟陰郡宋時為曹
 州地方輿紀要云曹州曹縣東南四十里有楚邱城春
 秋時戎州已氏之邑左傳隱公七年戎伐凡伯于楚邱
 又襄公十年宋享晉侯于楚邱蓋在曹宋間漢置已氏
 縣屬梁國是即杜氏所云在濟陰城武縣者也楚邱在
 漢為已氏縣屬梁國後漢屬濟陰郡隋屬梁郡開皇六
 年改從今名唐屬宋州宋建州為應天府號南京楚邱
 縣隸焉拱州崇寧四年建于開封府襄邑縣領縣二襄
 邑柘城克齋云今拱州楚邱蓋當日曾以楚邱屬也迨
 元始屬曹州明初省入曹縣衛南屬滑州後改隸澶州
 文獻通考云崇寧四年建州為北輔五年升為開德府
 太平寰宇記澶州衛南縣下云衛文公自曹邑遷楚邱
 即此城也漢為濮陽縣地隋開皇十六年于此置楚邱
 縣後以曹州有楚邱縣改名衛南此在衛之南垂故以

名縣又云楚邱城在縣西北四里詩云定之方中作于楚宮城豕記云齊桓築楚邱之城即此也是即亭林所謂不詳其地必在滑縣開州之間者也兩地懸殊何乃混而為一乎杜註于隱七年戎伐凡伯之邑釋曰衛地在濟陰城武縣西南于僖二年所城則曰衛邑本自不錯惟于戎伐下多衛地二字為不合耳然酈氏之說亦本漢志山陽郡成武縣下云有楚邱亭齊桓公所城遷衛文公于此子成公徙濮陽東郡濮陽縣下云衛成公自楚邱徙此故帝邱顛頊墟蓋篤信班固而不暇詳審爾泗水篇注云又東逕山陽郡城武縣之楚邱亭北而不別具一語以釋之于瓠子水篇濮陽西南十五里之鉏邱亭以沮楚同音以為楚邱非也了之合而觀之真可謂滑

突矣 又東北逕成武城西又東北逕郟城東疑郟徙也所未詳矣 全氏曰郟是魯邑如 又東北逕梁邱城西

地理志曰昌邑縣有梁邱鄉春秋莊公三十二年宋人

齊人會于梁邱者也 朱氏謀璋箋曰孫汝澄云按春秋宋公齊侯遇于梁邱 杜預

曰高平昌邑縣西南有梁邱鄉又東北于乘氏縣西而

北注菏水菏水又東南逕乘氏縣故城南縣即春秋之

乘邱也故地理風俗記曰濟陰乘氏縣故宋乘邱邑也

全氏曰乘邱非乘氏乘氏非宋地乃魯地一清按地理志濟陰郡乘氏縣師古注引應劭曰春秋敗宋師于乘邱此酈亭漢孝景中五年封梁孝王子買為侯國也地之所本

理志曰乘氏縣泗水東南至睢陵入淮郡國志曰乘氏

有泗水此乃荷澤也尚書有導荷澤之說自陶邱北東

至于荷無泗水之文又曰導荷澤被孟豬孟豬在睢陽

縣之東北闕駟十三州記曰不言入而言被者明不常

入也水盛方乃覆被矣澤水淼漫俱鍾睢泗故誌有睢

陵入淮之言以通苞泗名矣然諸水注泗者多不止此
可以終歸泗水便得擅通稱也或更有泗水亦可是水
之兼其目所未詳也

又東過昌邑縣北

荷水又東逕昌邑縣故城北地理志曰縣故梁也漢景

帝中六年分梁為山陽國漢武帝天漢四年更為昌邑

國以封昌邑王賀

一清按諸侯王表天漢四年封者是哀王髡亦見武五子傳乃賀之父也

道元誤矣

賀廢國除以為山陽郡王莽之鉅野郡也後更為

高平郡

一清按晉志高平國晉初分山陽置宋志云晉武帝泰始元年更名

後漢沈州治

縣令王密懷金謁東萊太守楊震震不受是其慎四知

處也大城東北有金城城內有沈州刺史河東薛季像

碑以郎中拜剡令甘露降園熹平四年遷州明年甘露

復降殿前樹從事馮巡主簿華操等相與褒樹表勒棠

政次西有沈州刺史茂陵楊叔恭碑從事孫光等以建

寧四年立西北有東太山成人班孟堅碑建和十年尚

書右丞拜沈州刺史從事秦閏等刊石頌德政碑咸列

焉

又東過金鄉縣南

郡國志曰山陽有金鄉縣荷水逕其故城南世謂之故

縣城北有金鄉山也

一清按郡國志山陽郡金鄉縣劉昭註引晉地道記曰縣多山所治

名金山鑿而得金故名今注云金鄉山縣蓋以山得名

又東過東緡縣北

濟水又東逕漢平狄將軍扶溝侯淮陽朱鮪冢墓北有石廟濟水又東逕東緡縣故城北故宋地春秋僖公二十三年齊侯伐宋圍緡十三州記曰山陽有東緡縣鄒衍曰余登緡城以望宋都者也後漢世祖建武十一年封馮異長子璋為侯國也

又東過方與縣北為菏水

濟水東逕重鄉城南左傳所謂臧文仲宿于重館者也菏水又東逕武棠亭北公羊以為濟上邑也城有高臺

二丈許其下臨水昔魯侯觀魚于棠謂此也在方與縣

故城北十里經所謂菏水也菏水又東逕泥母亭北春

秋左傳僖公七年秋盟于甯母謀伐鄭也菏水又東與

鉅野黃水合菏澤別名也黃水上承鉅澤諸陂澤有濛

澱育陂黃湖水東流謂之黃水又有薛訓渚水自渚歷

薛村前分為二流一水東注黃水一水西北入澤即洪

水也黃水東南流水南有漢荊州刺史李剛墓剛字叔

毅山陽高平人熹平元年卒見其碑有石闕祠堂石室

三間椽架高丈餘鏤石作椽瓦屋施平天造方井側荷

梁柱四壁隱起雕刻為君臣官屬龜龍麟鳳之文飛禽

走獸之像作制工麗不甚傷毀洪氏迺隸圖曰右荆州刺史李剛石室殘畫象

一軸高不及尺長一丈有半所圖車馬之上橫刻數字

云君為荆州刺史時前後導有騶騎有步卒標榜皆湮

沒在後一車碑失其半止存東郡二字向前一車前

有勝惟郡太守三字可認前後亦有騶騎步卒及沒字

勝又一車僅存馬足泰半無碑少前六騎形狀結束胡

人也其上亦刻數字惟鳥桓二字可認漢長水校尉主

鳥桓騎又有護鳥桓校尉此以鳥桓為導騎必二校中

李君嘗歷其一所圖列女傳三事其一三一人車一馬一

無鹽醜女齊宣王侍郎凡三勝車前一勝無字其一四

人三勝惟梁高行梁使者二勝有字此二列女武梁碑

中亦有一勝而其一人樊姬楚莊王孫叔敖鄭女凡四勝

後馮方圓仲宛轉假借書欲絕筆而得之鄺氏所載古

碑百餘惟李剛魯峻二墓有圖畫趙氏雖云曾得魯君

畫像而碑錄中無其目此碑自來好古之士未之見也

隸釋所有僅七種除武梁之外餘碑他無別本數十年

後紙敝墨渝航古之士撫卷

太息亦猶今之閱水經也

黃水又東逕鉅野縣北何

承天曰鉅野湖澤廣大南通洙泗北連清濟舊縣故城

正在澤中故欲置戍於此城城之所在則鉅野澤也衍

東北出為大野矣昔西狩獲麟于是處也皇覽曰山陽

鉅野縣有肩髀冢重聚大小與闕冢等傳言蚩尤與黃

帝戰剋之于涿鹿之野身體異處故別葬焉黃水又東

逕咸亭北春秋桓公七年經書焚咸邱者也水南有金

鄉山縣之東界也金鄉數山皆空中穴口謂之隧也戴

延之西征記曰焦氏山北數里有漢司隸校尉魯恭冢

一清按魯恭當作魯峻其墓碑云君諱峻字仲嚴山陽昌邑人金石錄魯峻碑跋尾云嘗得石室所刻畫象與延之所記合其他地理書如方輿志寰宇記之類皆作峻惟水經注誤轉寫為恭隸釋曰漢故司隸校尉忠惠

父魯君碑在濟州任城縣魯君名峻歷郎中謁者河內丞侍御史頓邱令九江守議郎太尉長史御史中丞司隸校尉遭母憂自乞拜議郎服竟還拜屯騎校尉靈帝熹平元年卒明年葬門生丁直等三百二十人謚之曰忠惠其子獻立石作銘水經注亦載此碑但誤以為名恭爾按酈注止言魯冢及石祠石廟而不言有碑也詳見穿山得白蛇白兔不葬更葬山南鑿而得金故曰金

山山形峻峭冢前有石祠石廟四壁皆青石隱起自書

契以來忠臣孝子貞婦孔子及弟子七十二人形像像

邊皆刻石記之文字分明隸續魯峻石壁殘畫像跋曰右二石竝廣三尺崇二尺此

石上下三橫首行一勝云祠南郊從大駕出時次有大車帳下騎鮮明小史騎凡十六勝大車之上一勝三字

上兩字略有左畔偏傍似是校尉騎字車前兩旁鮮明

八騎步于中者四人一勝鈴下三十餘騎如魚鱗然列兩行橫車之後後有駙馬二匹帳下一騎小史持幢四騎次橫薦士一人有勝奏曹書佐主簿車各一勝有車

馬騎史僕射二騎鈴下二騎各有勝第三橫冠劍接武

十有五人人一勝蓋闕里之先賢也次石上橫兩勝云

君為九江太守時車前導者八人後騎石損其半少前

一勝云功曹史導有車馬車前二騎其勝湮滅中橫但

刻雲氣下橫十有六人形象標勝與前石同後漢志大

駕鹵簿五校在前按魯峻碑嘗歷九江太守終于屯騎

校尉從駕南郊乃屯騎之職藏此者不知為何人碑既

有九江標勝又有屯騎職掌更有先賢形像定為魯峻

石壁所刻其誰曰不然考孔子家語史記七十子傳邾

子斂名異梁子魚名鱣商子木名瞿左子行名郢縣子

期名成樊子遲名須顏子柳名辛冉子產名季顏子路

名無繇叔子其者叔仲會也史作子期子魯者姓冉名孺子象者姓縣名亶子景伯者子服何也唐劉懷玉作孔聖真宗錄以子服景伯在七十子之閒求子斂者疑是漆雕哆地皇候鈺書七作束韓勅碑書漆作涑漆雕哆字子斂恐此求字是漆之省文縣子期史作子祺姓駟者恐是壤駟赤子偃恐是言游如顏子思襄子魯襄子思數人姓氏分明與史家異同魯根史記作申棠家語作申續檀弓以申詳為顓孫子張之鞮二家不能次以為兩地音聲如此則傳聞異辭無足疑者又二石長

過于前其一之上橫畫圖人物如武梁畫象主坐客拜侍于前後者六又主客三人列坐侍者四中橫三車如雍邱令畫一車導騎二一車兩人在前一車一人在後屋下之人三五賓主三車有標榜皆湮滅下橫十有七人如前石所圖聖門高弟人亦一勝一字不可認其一則上橫七騎皆右馳中橫二車一有一導騎一則倍之未有五人在屋下二稚子在屋上下橫兩車皆駕一馬又一車有導騎二未有五人在屋下立車皆有榜惟四導騎者上下各一字粗可認上曰君下曰郎魯君再為議郎豈謂是乎以其冠劍人物絕類九江石壁所畫疑此二石亦是魯祠四壁者汪聖錫家有此碑後漢志列侯會耕祠導從中有鮮明卒朱氏畫史朱浮墓石壁人物有鮮明隊或者不能細認先賢姓氏但又有石牀見有鮮明數榜遂謂是朱浮墓壁畫象非也 又有石牀長八尺磨瑩鮮明叩之聲聞遠近時太尉從事中郎傅珍之諮議參軍周安穆折敗石牀各取去為魯氏之後所訟二人竝免官焦氏山東即金鄉山也有冢謂之秦

王陵山上二百步得冢口塹深十丈兩壁峻峭廣二丈入行七十步得埏門門外左右皆有空可容五六十人謂之白馬空埏門內二丈得外堂外堂之後又得內堂觀者皆執燭而行雖無他雕鏤然治石甚精或云是漢昌邑哀王冢所未詳也東南有范巨卿冢石柱猶存巨卿名式山陽之金鄉人漢荊州刺史與汝南張劭長沙陳平子石交號為死友矣 一清按隸釋云故廬江太守范府君之碑在濟州任城魏明帝青龍三年縣長薛君鄉人翟循等所立也 黃水又東南逕任城郡之亢父縣故城西夏后氏之任國也漢章帝元和元年別為任城在北 一清按續志任城國劉昭補註云章帝元和元年分東平為任城 王莽之延就

亭也縣有詩亭春秋之詩國也王莽更之曰順父矣地理志東平屬縣也世祖建武二年封劉隆為侯國其中謂之桓公溝南至方與縣入於菏水菏水又東逕秦梁夾岸積石一里高二丈言秦始皇東巡所造因以名焉

菏水又東過湖陸縣南東入於泗水

澤水所鍾也尚書曰浮於淮泗達於河是也一清按達

當依說文改作荷字黃公紹韻會舉要曰荷或作荷余按舊注尚書導荷澤被孟豬集韻亦作荷案淮泗入河必導于汴世謂汴是隋煬帝始通而疑禹貢有浮于淮泗達于河之文說者牽合傳會或指鴻溝引河水入泗安知非禹之迹或謂當時必有可達之理蔡氏書傳亦莫知所折衷今案說文荷是音柯注引禹貢浮于淮泗達于河與導荷澤同則是達于荷非達于河也許慎所見蓋古文尚書後人傳寫之誤不知從草例以禹貢上

下文達于河為句改荷為河陸德明又以河音如字遂啓後人淮泗不能達河之疑然陸氏于荷澤下注徐音柯又工可切于浮于淮泗達于河下亦注云說文作荷工可切水出山陽湖陵南則非九河之河明矣如字之音陸氏誤也近世惟新安王氏曰濟入河溢為滎會于荷注于泗則河為荷益明矣新安王氏是王炎晦叔尚書全解古文尚書疏證曰按浮于淮泗達于荷今本作河二孔無傳疏止陸德明引說文作荷余考之荷字是也蓋荷者澤名為濟水所經又東至于荷者是在豫之東北即徐之西北舟則自淮而泗自泗而荷然後由荷入濟以達于河此徐之貢道也或曰曷不詳言之余曰以上文充州浮于濟潔達于河次青州便浮于汶達于濟不復言達于河矣又次徐州浮于淮泗達于河亦不復言達于濟矣至揚州則沿于江海達于淮泗且復當日水道之自然而其敘法從變字法從簡真屬聖經之筆直言達于河不識其何途之從惟言達于荷而水道歷歷然在目一字之長有助不小禹貢雖指曰青承充曰達于濟則由濟入潔可知矣徐承青曰達于荷則由荷入濟可知矣揚承徐曰達于淮泗則由淮入泗由

泗入荷可知矣淮通泗泗通荷荷通濟濟通河四州之貢道無不由濟者蓋閩以順推胡以逆沂可互相發明也雖指又曰漢志山陽郡湖陵縣下云禹貢浮于淮泗達于河水在南漢時湖陵縣安得有黃河此河字明係荷字之誤水在南謂荷水在南也酈道元泗水注引此文云荷水在南水經濟水篇言荷水過湖陸縣南東入泗皆確證不獨許慎說文作荷也

東觀漢記曰蘇茂殺淮揚太守得其郡營廣樂大司馬吳漢圍茂茂將其精兵突至湖陸與劉丞相會濟陰山陽濟兵于此處也

又東南過沛縣東北

濟與泗亂故沛納兩稱矣東觀漢記安平侯蓋延傳曰延為虎牙大將軍與永等戰永軍反走溺水者半復與戰連破之遂平沛楚臨淮悉降延令沛修高祖廟置嗇

夫祝宰樂人因齋戒祠高廟也

又東南過留縣北

留縣故城翼佩泗濟宋邑也春秋左傳所謂侵宋呂留也故繁休伯避地賦曰朝余發乎泗洲夕余宿於留鄉者也張良委身漢祖始自此矣終亦取封焉城內有張良廟也

又東過彭城縣北睢水從西來注之

濟水又南逕彭城縣之故城東北隅不東過也睢水自西注之城北枕水湄濟水又南逕彭城縣故城東不逕其縣北也蓋經誤證

又東南過徐縣北

地理志曰臨淮郡漢武帝元狩五年置治徐縣王莽更之曰淮平縣曰徐調故徐國也春秋昭公三十年吳子執鍾吾子遂伐徐防山以水之遂滅徐徐子奔楚楚救徐弗及遂城夷以處之張華博物志錄著作令史茅温所爲送劉成國徐州地理志曰徐偃王之異言徐君宮人娠而生卵以爲不祥棄之于水濱孤獨母有犬名曰鵠倉獵于水側得棄卵銜以來歸孤獨母以爲異覆煖之遂成兒生時偃故以爲名徐君宮中聞之乃更錄取長而仁智襲君徐國後鵠倉臨死生角而九尾實黃龍

也偃王厝之徐中今見有狗壟焉偃王治國仁義著聞欲舟行上國乃導溝陳蔡之間得朱弓矢以得天瑞遂因名爲號自稱徐偃王江淮諸侯服從者三十六國周王聞之遣使至楚令伐之偃王愛民不鬪遂爲楚敗北走彭城武原縣東山下百姓隨者萬數因名其山爲徐山上立石室廟有神靈民人請禱焉依文卽事似有符驗但世代綿遠難以詳矣今徐城外有徐君墓昔延陵季子解劍于此所謂不違心許也

又東至下邳睢陵縣南入於淮

濟水與泗水渾濤東南流至角城同入淮經書睢陵誤

耳

水經注釋卷八終

水經注釋卷九

仁和趙一清誠夫錄

清水

沁水

淇水

蕩水

洹水

清水出河內修武縣之北黑山

黑山在縣北白鹿山東清水所出也上承諸陂散泉積以成川西南流屈曲瀑布垂巖懸河注壑二十餘丈雷撲之聲震動山谷左右石壁層深獸跡不交隍中散水霧合視不見底南峯北嶺多結禪棲之士東巖西谷又是剎靈之圖竹柏之懷與神心妙遠仁智之性共山水

効深更為勝處也其水歷澗飛流清冷洞觀謂之清水
 矣谿曰瑤谿又曰瑤澗清水又南與小瑤水合水近出
 西谿北窮谿東南流注之清水清水又東南流吳澤陂
 水注之水上承吳陂於修武縣故城西北修武故甯也
 亦曰南陽矣馬季長曰晉地自朝歌以北至中山為東
 陽朝歌以南至軹為南陽故應劭地理風俗記云河內
 殷國也周名之為南陽又曰晉始啓南陽今南陽城是
 也秦始皇改曰修武徐廣王隱竝言始皇改瓚注漢書
 云案韓非書秦昭王越趙長平西伐修武時秦未兼天
 下修武之名久矣余案韓詩外傳言武王伐紂勒兵於

甯更名甯曰修武矣魏獻子田大陸還卒於甯是也漢
 高帝八年封都尉魏遯為侯國亦曰大修武有小故稱
 大小修武在東漢祖與滕公濟自玉門津而宿小修武
 者也大陸即吳澤矣魏土地記曰修武城西北二十里
 有吳澤水陂南北二十許里東西三十里西則界溝水
 入焉水有二源北水上承河內野王縣東北光溝為長
 明溝分枝津東逕雍城南寒泉水注之水出雍城西北
 泉流南注逕雍城西春秋僖公二十四年王將以狄伐
 鄭富辰諫曰雍文之昭也京相璠曰今河內山陽西有
 故雍城又東南注長明溝溝水又東逕射犬城北漢大

司馬張揚為將楊醜所害眭固殺醜屯此欲北合袁紹
典略曰眭固字白菟或戒固曰將軍字菟而此邑名犬

菟見犬其勢必驚宜急去菟不從漢興平四年一清按魏書武

帝紀事在建安四年興平改元僅二年酈氏誤記也魏太祖斬之於此以魏種為

河內太守守之兗州叛太祖曰唯種不棄孤及走太祖

怒曰種不南走越北走胡不汝置也射犬平禽之公曰

難一清按魏書作唯何氏焯曰此正可與史參異同耳其才也釋而用之長明溝

水東入石澗東流蔡溝水入焉水上承州縣北白馬溝

東分謂之蔡溝東會長明溝水又東逕修武縣之吳亭

北東入吳陂水次北有苟泉水入焉水出山陽縣故修

武城西南同源分派裂為二水南為苟泉北則吳瀆二

瀆雙導俱東入陂山陽縣東北二十五里有陸真阜南

有皇母馬鳴二泉東南合注于吳陂也次陸真阜之東

北得覆釜堆堆南有三泉相去四五里參差合次南注

於陂泉在濁鹿城西建安二十五年魏封漢獻帝為山

陽公濁鹿城即是公所居也陂水之北際澤側有隤城

也春秋隱公十一年王以攢茅隤十二邑與司寇蘇忿

生者也何氏曰按左傳乃是以蘇忿生之田與鄭蘇公武王之司寇注誤記京相璠曰河

內修武縣北有故隤城實中今世俗謂之皮垣方四百

步實中高八丈際陂北隔水一十五里俗所謂蘭邱也

方二百步西一十里又有一邱際山世謂之勅邱方五百步形狀相類疑卽古攢茅也杜預曰二邑在修武縣北所未詳也又東長泉水注之源出白鹿山東南伏流逕一十三里重源濬發於鄧城西北東南伏流世亦謂之重泉水也又逕七賢祠東左右筠篁列植冬夏不變貞萋魏步兵校尉陳畱阮籍中散大夫譙國嵇康晉司徒河內山濤司徒琅邪王戎黃門郎河內向秀建威參軍沛國劉伶始平太守阮咸等同居山陽結自得之遊時人號之爲竹林七賢也向子期所謂山陽舊居也後人立廟於其處廟南又有一泉東南流注於長泉水郭

緣生述征記所云白鹿山東南二十五里有嵇公故居以居時有遺竹焉蓋謂此也其水又南逕鄧城東名之爲鄧瀆又謂之爲白屋水也昔司馬懿征公孫淵還達白屋卽於此也其水又東南流逕隕城北又東南歷澤注于陂泉水東流謂之八光溝而東流注于清水謂之長清河而東周永豐塢有丁公泉發于焦泉之右次東又得焦泉泉發于天門之左天井固右天門山石自空狀若門焉廣三丈高兩匹深丈餘更無所出世謂之天門也東五百餘步中有石穴西向裁得容人平行東南

入徑至天井

一清按太平御覽河北天門山引水經注曰俗謂之百家巖巖可容百家故以爲名

山有石穴狀如門纔得通人自平直上三匹有餘扳躡地東南入便至天井與此文不同而昇至上平東西二百步南北七百步四面峻絕無由昇陟矣上有比丘釋僧訓精舍寺有十餘僧給養難周多出下平有志者居之寺左右雜樹疎挺有一石泉方丈餘清水湛然常無增減山居者資以給飲北有石室二口舊是隱者念一之所今無人矣泉發于北阜南流成溪世謂之焦泉也次東得魚鮑泉次東得張波泉次東得三淵泉梗河參連女宿相屬是四川在重門城西竝單川南注也重門城昔齊王芳為司馬師廢之宮於此即魏志所謂送齊王於河內重門者也城在共縣故

城西北二十里城南有安陽陂次東又得卓水陂次東

有北門陂

一清案北門陂即百門陂也魏書地形志林慮郡共有卓水陂柏門山柏門水南流名太

清水金史地理志衛州蘇門有百門陂蘇門即漢志之共縣隋曰共城金改蘇門今河南衛輝府之輝縣也縣西北七里有蘇門山亦曰百門山有百門泉左傳定公十四年晉人敗鄭師及范氏之師于百泉即百門泉矣百與北音相近致譌

陂方五百步在共縣故城西漢高帝八年封

旅罷師為共嚴侯國即共和之故國也共伯既歸帝政

逍遙于共山之上山在國北所謂共北山也仙者孫登

之所處袁彥伯竹林七賢傳嵇叔夜嘗採藥山澤遇之

于山冬以被髮自覆夏則編草為裳彈一弦琴而五聲

和其水三川南合謂之清川又南逕凡城東司馬彪袁

山松郡國志曰其縣有汎亭周凡伯國春秋隱公七年經書王使凡伯來聘是也杜預曰汲郡共縣東南有凡城今在西南其水又西南與前四水總為一瀆又謂之陶水南流注于清水清水又東周新豐塢又東注也清

案太平寰宇記修武縣下引水經注云五里泉在修武鄉今本無之

東北過獲嘉縣北

漢書稱越相呂嘉反武帝元鼎六年巡行於汲郡中鄉得呂嘉首因以為獲嘉縣後漢封侍中馮石為侯國縣故城西有漢桂陽太守趙越墓冢北有碑越字彥善縣人也累遷桂陽郡五官將尚書僕射遭憂服闋守河南

尹建寧中卒碑東又有一碑碑北有石柱石牛羊虎俱碎淪毀莫記清水又東周新樂城城在獲嘉縣故城東北即汲之新中鄉也

又東過汲縣北

縣故汲郡治晉太康中立城西北有石夾水飛湍濬急也人亦謂之礮溪言太公常釣於此也城東門北側有太公廟廟前有碑碑云太公望者河內汲人也縣民故會稽太守杜宣白令崔瑗曰太公本生於汲舊居猶存君與高國同宗太公載在經傳今臨此國宜正其位以明尊祖之義於是國老王喜廷掾鄭篤功曹邠勤等咸

曰宜之遂立壇祀為之位主城北三十里有太公泉泉
 上又有太公廟廟側高林秀木翹楚競茂相傳云太公
 之故居也晉太康中范陽盧無忌為汲令立碑于其上
 金石錄跋尾曰晉太公碑略云太公望者此縣人大晉
 受命四海統一太康二年縣之西偏有盜發冢而得竹
 策之書藏書之年當秦坑儒之前八十六歲又云其周
 志曰文王夢天帝服元禳以立于合狐之津帝曰昌賜
 汝望文王再拜稽首太公于後亦再拜稽首文王夢之
 夜太公夢之亦然其後文王見太公而詢之曰而名為
 望乎荅曰唯為望文王曰吾如有所於汝見太公言其
 年月與其日且盡道其言臣以此得見也文王曰有之
 有之遂與之歸以為卿士又曰其紀年曰康王六年齊
 太公卒參考年數蓋一百一十餘歲按前世所傳汲冢
 諸書獨有紀年穆天子傳師春等不載所謂周志者不
 知為何書而杜預左氏傳後敘云汲冢書凡七十五卷
 皆藏祕府預親見之以此知不特十餘萬言其亡逸見
 于今者絕少也碑汲縣令盧無忌立後題太康十年三

月太公避紂之亂屠隱市朝遯釣魚水何必渭濱然後
 云太公避紂之亂屠隱市朝遯釣魚水何必渭濱然後
 礮溪苟愜神心曲渚則可礮溪之名斯無嫌矣清水又
 東逕故石梁下梁跨水上橋石崩褫餘基尚存清水又
 東與倉水合水出西北方山上方山在衛縣西有倉谷
 谷有倉玉珉石故名焉其水東南流潛行地下又東南
 復出俗謂之雹水東南歷姆野自朝歌以南南暨清水
 土地平行據臯跨澤悉姆野矣郡國志曰朝歌縣南有
 牧野竹書紀年曰周武王率西夷諸侯伐殷敗之于姆
 野詩所謂姆野洋洋檀車煌煌者也有殷大夫比干冢
 前有石銘題隸云殷大夫比干之墓所記唯此今已中

折不知誰所誌也曹氏安太師比干錄曰按衛輝府舊志云殷少師比干墓在汲縣西北一十五里墓前有殷比干墓四字碑年深石斷字畫不全世傳以為孔子所書今此碑見存竊觀其體勢與周穆王時書吉日癸巳石刻相類其為古筆無疑謹用摹錄以暴于世云葉氏奕苞續金石錄曰比干墓碑在汲縣漢隸釋文漢隸字源辨其繆然比干為三古殺身成仁之第一人而尼父是其族孫為之標識宜也以疑傳疑存之亦無不可洪氏曰大觀中會稽石國佐有此四字碑如歐趙皆未之見予按今存四字乃隸書決非宣聖之筆洪說當不繆也一清按漢隸釋文洪文惠公撰集即葉氏所引之文是也亦見隸續漢隸字源乃宋樵李婁機彥發所纂其言曰水經云朝歌縣南牧野比干冢前有石銘隸云殷大夫比干之墓今只四字復不完石公弼跋云殷比干墓四字在今衛州比干墓上世傳孔子書然隸始于秦非孔子書必矣字畫勁古當是漢人書又比干錄尚有銅盤銘十六字左林右泉後崗前道萬世之寧茲焉是寶亦是先聖古文篆曹以寧云唐開元中為耕地者所得至元延祐戊午衛輝府路學正王

公悅臨摹汝帖推官張淑記之汲尹王元恕勒石是太則善長所不及知也好古之士安得長存天地間哉

和中高祖孝文皇帝南巡親幸其墳而加弔焉刊石樹碑

列于墓隧矣金石錄跋尾曰後魏孝文帝弔比干文其首已殘缺惟元載字可識其下云歲御次

乎闞茂望舒會于星紀十有四日惟甲申按爾雅云歲在戊曰闞茂又鄭康成注月令仲冬者日月會于星紀後魏孝文以太和十八年十一月甲申經比干墓親為弔文樹碑而刻之是歲甲戌其說皆合其未嘗改元而稱元載者孝文以是歲遷都洛陽蓋以遷都之歲言之也又云碑陰盡紀侍從羣臣官爵姓名一清按是碑文載太師比干錄及衛輝府志文繁不錄德甫所云碑首殘缺惟元載字可識今其碑云惟皇構遷中之元載正以宅洛之

故三會亭也以淇清合河故受名焉清水又屈而南逕

屬皇臺東北南注之也

又東入於河

謂之清口即淇河口也蓋互受其名耳地理志曰清河

水出內黃縣南

一清按漢志魏郡內黃縣清河水在南

無清水可來所有

者唯鍾是水耳蓋河徙南注清水瀆移匯流逕絕餘目

尚存故東川有清河之稱相嗣不斷曹公開白溝遏水

北注方復故瀆矣

沁水出上黨涅縣謁戾山

沁水即涅水也或言出穀遠縣羊頭山世靡谷三源奇

注逕瀉一隍又南會三水浴歷出左右近溪參差翼注

之也

南過穀遠縣東又南過猗氏縣東

穀遠縣王莽之穀近也沁水又南逕猗氏縣故城東劉

聰以詹事魯繇為冀州治此也沁水又南歷猗氏關又

南與羸羸水合水出東北巨峻山乘高瀉浪觸石流響

世人因聲以納稱西南流注于沁沁水又南與秦川水

合水出巨峻山東帶引衆溪積以成川又西南逕端氏

縣故城東昔韓趙魏分晉遷晉君於端氏縣即此是也

其水南流入於沁水

又南過陽阿縣東

沁水南逕陽阿縣故城西魏土地記曰建興郡治陽阿

縣郡西四十里有沁水南流沁水又南與濩澤水合水出澤城西白澗嶺下東逕濩澤墨子曰舜漁濩澤應劭曰澤在縣西北又東逕濩澤縣故城南蓋以澤氏縣也竹書紀年梁惠成王十九年晉取元武濩澤者也其水際城東注又東合清澗水水出其城北東南逕澤城東又南入于濩澤水濩澤水又東得陽泉水口水出鹿臺山山上有水淵而不流其水東逕陽陵城南即陽阿縣之故城也漢高帝七年封卞訢為侯國一清按史表作齊侯其石卞訢封邑當屬平原之阿陽非此陽阿也詳河水篇注水歷嶠嶢山東下與黑嶺水合水出西北黑嶺下即開陞也其水東南流逕

北鄉亭下又東南逕陽陵城東南注陽泉水陽泉水又南注濩澤水又東南又有上澗水注之水導源西北輔山東逕銅于崖南歷析城山北山在濩澤南禹貢所謂砥柱析城至于王屋也山甚高峻上平坦下有二泉東濁西清左右不生草木數十步外多細竹其水自山陰東入濩澤水濩澤水又東南注于沁水沁水又東南陽阿水左入焉水北出陽阿川南流逕建興郡西其水又東南流逕午壁亭東而南入山浴波漱石澗澗八丈環濤轂轉西南流入于沁水又南五十餘里浴流上下步逕裁通小竹細筍被于山渚蒙龍茂密奇為翳薈也

又南出山過沁水縣北

沁水南逕石門世謂之沁口魏土地記曰河內郡野王縣西七十里有沁水左逕沁水城西附城東南流也石門是晉安平獻王司馬孚之爲魏野王典農中郎將之所造也按其表云臣孚言臣被明詔興河內水利臣旣到檢行沁水源出銅鞮山屈曲周迴水道九百里自太行以西王屋以東層巖高峻天時霖雨衆谷走水小石漂迸木門朽敗稻田汎濫歲功不成臣輒案行去堰五里以外方石可得數萬餘枚臣以爲方石爲門若天亢旱增堰進水若天霖雨陂澤充溢則閉石斷水空渠衍

澇足以成河雲雨由人經國之謀暫勞永逸聖王所許願陛下特出臣表勅大司農府給人工勿使稽延以贊時要臣孚言詔書聽許於是夾岸累石結以爲門用代木門枋故石門舊有枋口之稱矣溉田頃畝之數間關歲月之功事見門側石銘矣水西有孔山山上石穴洞開穴內石上有車轍牛跡者舊傳云自然成著非人功所就也其水南分爲二水一水南出爲朱溝水沁水又逕沁水縣故城北蓋藉水以名縣矣春秋之少水也京相璠曰晉地矣又云少水今沁水也沁水又東逕沁水亭北世謂之小沁城沁水又東右合小沁水水出北山

臺淳淵南流為臺淳水東南入沁水沁水又東倍澗水注之水北出五行之山南流注于沁水

又東過野王縣北

沁水又東邗水注之水出太行之阜山即五行之異名也淮南子曰武王欲築宮于五行之山周公曰五行嶮固德能覆也內貢迴矣使吾暴亂則伐我難矣君子以為能持滿高誘云今太行山也在河內野王縣西北上黨關也詩所謂徒矧野王道傾蓋上黨關即此山矣其水南流逕邗城西故邗國也城南有邗臺春秋僖公二十四年王將伐鄭富辰諫曰邗武之穆也京相璠曰今

野王西北三十里有故邗城邗臺是也今故城當太行

南路道出其中漢武帝封李壽為侯國一清按漢表是征和二年封

邗水又東南逕孔子廟東廟庭有碑魏太和元年孔靈

度等以舊宇毀落上求修復野王令范衆愛河內太守

元真刺史咸陽公高允表聞立碑于廟治中劉明別駕

呂次文主簿向班虎荀靈龜以宣尼大聖非碑頌所稱

宜立記焉云仲尼傷道不行欲北從趙鞅聞殺鳴犢遂

旋車而反及其後也晉人思之於太行嶺南為之立廟

蓋往時迴轅處也余按諸子書及史籍之文竝言仲尼

臨河而歎曰丘之不濟命也夫是非太行迴轅之言也

碑云魯國孔氏官於洛陽因居廟下以奉烝嘗斯言至矣蓋孔因遷山下追思聖祖故立廟存饗耳其猶劉累遷魯立堯祠於山矣非謂迴轅於此也邗水東南逕邗亭西京相璠曰又有亭在臺西南三十里今是亭在邗城東南七八里蓋京氏之謬耳或更有之余所不詳其水又南流注于沁沁水東逕野王縣故城北秦昭王四十四年白起攻太行道絕而韓之野王降始皇拔魏東地置東郡衛元君自濮陽徙野王卽此縣也漢高帝元年爲殷國二年爲河內郡王莽之後隊縣曰平野矣魏懷州刺史治皇都遷洛省州復郡水北有華嶽廟廟側

有攢柏數百根對郭臨川負岡蔭渚青青彌望奇可翫也懷州刺史頓邱李洪之之所經構也廟有碑焉是河內郡功曹山陽荀靈龜以和平四年造天安元年立沁水又東朱溝枝津入焉又東與丹水合水出上黨高都縣故城東北阜下俗謂之源源水山海經曰沁水之東有林焉名曰丹林丹水出焉卽斯水矣丹水自源東北流又屈而東注左會絕水地理志曰高都縣有莞谷丹水所出東南入絕水是也絕水出涿氏縣西北楊谷故地理志曰楊谷絕水所出東南流左會長平水水出長平縣西北小山東南流逕其縣故城

一清按魏書地形志邵郡皇興四年

置領萇平縣 泫氏之長平亭也史記曰秦使左庶長王
即斯縣也

齧攻韓取上黨上黨民走趙趙軍長平使廉頗為將後

遣馬服君之子趙括代之秦密使武安君白起攻之括

四十萬衆降起起坑之於此上黨記曰長平城在郡之

南秦壘在城西二軍共食流水澗相去五里秦坑趙衆

收頭顱築臺於壘中因山為臺崔嵬築起今仍號之曰

白起臺城之左右浴山互隰南北五十許里東西二十

餘里悉秦趙故壘遺壁舊存焉漢武帝元朔二年以封

將軍衛青為侯國全氏曰衛將軍所封國索隱曰汝南

其子封宜春侯亦在汝南然則非上黨之長平也一清按史記秦始皇本紀五年將軍驍攻

魏定酸棗燕虛長平裴駟曰地理志汝南有長平縣故

城在今陳州西六十里 其水東南流注絕水絕水又東南流逕泫

氏縣故城北竹書紀年曰晉烈公元年趙獻子城泫氏

絕水東南與泫水會水導源縣西北泫谷東流逕一故

城南俗謂之都鄉城又東南逕泫氏縣故城南世祖建

武六年封萬普為侯國而東會絕水亂流東南入高都

縣右入丹水一清按漢志丹水入泫泫即絕也絕水南

上黨記曰長平城在郡南山中一清按劉昭郡國志補

在郡南山中百二十里注引上黨記曰白起城

長平城即白起城也 丹水出長平北山南流秦坑趙

衆流血丹川由是俗名為丹水斯為不經矣丹水又東

南流注于丹谷即劉越石扶風歌所謂丹水者也危林

琨扶風歌曰朝發廣莫門暮宿丹水山文選李善注引
晉宮閣名曰洛陽城廣莫門北向漢書上黨高都縣莞
谷丹水所出也蓋即酈元之說予按上黨去維千五百
里朝發維城暮宿高都雖有乘風之翼躡景之足不能
如是之疾且其詩曰顧瞻望宮闕寧有天井關頭可睇
德陽殿角乎考地志宏農有丹水縣丹水出上維家領
山東至析入均晉書地道記曰縣有太行關丹溪為關
者斯為近之耳

之東谷途自此去不復由關矣丹水又逕二石人北而
各在一山角倚相望南為河內北曰上黨二郡以之分
境丹水又東南歷西巖下巖下有泉湧發洪流巨輪
淵深不測蘋藻冬芹竟川含綠雖嚴辰肅月燕麥暄萋
丹水又南白水注之水出高都縣故城西所謂長平白
水也東南流歷天井關地理志曰高都縣有天井關蔡

邕曰太行山上有天井關在井北遂因名焉故劉歆遂
初賦曰馳太行之嶮峻入天井之高關太元十五年晉
征虜將軍朱序破慕容永於太行遣軍至白水去長子
一百六十里白水又東天井溪水會焉水出天井關清

按章懷後漢書注曰太行山上
天井關南有天井泉水三所北流注白水世謂之北

流泉白水又東南流入丹水謂之白水交丹水又東南
出山逕鄴城西城在山際俗謂之期城非也司馬彪郡

國志曰山陽有鄴城京相璠曰河內山陽西北六十里
有鄴城竹書紀年曰梁惠成王元年趙成侯偃韓懿侯
若伐我葵即此城也丹水又南屈而西轉光溝水出焉

丹水又西逕苑鄉城北南屈東轉逕其城南東南流注于沁謂之丹口竹書紀年曰晉出公五年丹水三日絕不流幽公九年丹水出相反擊即此水也沁水又東光溝水注之也水首受丹水東南流界溝水出焉又南入沁水又東南流逕成鄉城北又東逕中都亭南又合界溝水水上承光溝東南流長明溝水出焉又南逕中都亭西而南流注于沁水也

又東過周縣北

縣故周也一清按水經多以州為周如武周泉周之類此是漢志河內郡之州縣而水經以為周縣故以縣故州也釋之後人春秋左傳隱公十有一年周併注之州字亦改從周

以賜鄭公孫段六國時韓宣子徙居之何氏曰此注多在昭公三年去隱公十一年甚遠韓起又不逮六國時且亦未嘗徙居之全氏曰周以賜鄭下有脫文蓋州本溫地蘇忿生叛王以賜鄭而鄭不能有也晉啓南陽州入焉趙氏卻氏欒氏遞有之昭公三年晉以賜鄭公孫段七年復歸之晉而韓宣子以易原縣于宋樂大心然其後仍屬晉公家宋行人樂祁之死晉人止其尸于州以求盟是也史記韓宣子晚居州然則宣子雖不逮六國時而未始不居州也其文不見于左而見于史義未盡有白馬溝水注之水首受白馬湖湖一名朱管陂陂上承長明溝湖水東南流逕金亭西分為二水一水東出為蔡溝一水南流注于沁也

又東過懷縣之北

韓詩外傳曰武王伐紂到邢邱更名邢邱曰懷春秋時

赤翟伐晉圍懷是也王莽以為河內故河內郡治也舊三河之地矣韋昭曰河南河東河內為三河也縣北有沁陽城沁水逕其南而東注也

又東過武德縣南又東南至滎陽縣北東入于河

沁水於縣南水積為陂通結數湖有朱溝水注之其水上承沁水於沁水縣西北自枋口東南流奉溝水右出焉又東南流右泄為沙溝水也其水又東南於野王城西枝渠左出焉以周城漑東逕野王城南又屈逕其城東而北注沁水朱溝自枝渠東南逕州城南又東逕懷城南又東逕殷城北郭緣生述征記曰河之北岸河內

懷縣有殷城或謂楚漢之際殷王卬治之非也余按竹

書紀年云秦師伐鄭次于懷城殷卽是城也然則殷之

為名久矣知非從卬始昔劉聰以郭默為殷州刺史都

督緣河諸軍事治此全氏曰郭默嘗附劉曜非劉聰朱溝水又東南注

于湖湖水右納沙溝水分朱溝南派東南逕安昌城

西漢成帝河平四年封丞相張禹為侯國全氏曰張禹所封在汝南

地理志汝南郡安昌縣下云侯國外戚恩澤侯表亦云是汝南方輿紀要安昌城在信陽州西北七十里漢縣屬汝南郡亦見淮水注今城之東南有古冢時人謂之張禹墓余

按漢書禹河內軹人徙家蓮勺鴻嘉元年禹以老乞骸自治冢塋起祠堂於平陵之肥牛亭近延陵奏請之詔

為徒亭哀帝建平二年薨遂葬于彼此則非也沙溝水
 又東逕陞城北春秋僖公二十五年取太叔於溫殺之
 於陞城是也京相璠曰在懷縣西南又逕殷城西東南
 流入於陂陂水又直武德縣南至滎陽縣北東南流入
 于河先儒亦咸謂是溝為沛渠故班固及闕駟竝言沛
 水至武德入河蓋沛水枝瀆條分所在布稱亦兼丹水
 之日矣

淇水出河內隆慮縣西大號山

山海經曰淇水出沮洳山水出山側頽波瀾注衝激橫
 山山上合下開可減六七十步巨石礫砢交積隍間傾

瀾洊盪勢同雷轉激水散氛曖若霧合又東北沾水注
 之水出壺關縣東沾臺下石壁崇高昂藏隱天泉流發
 于西北隅與金谷水合金谷即沾臺之西溪也東北會
 沾水又東流注于淇淇水又逕南羅川又歷三羅城北
 東北與女臺水合水發西北三女臺下東北流注于淇

一清按漢志上黨郡壺關縣下沾水東至朝歌入淇

淇水又東北逕淇陽川逕石

城西北城在原上帶澗枕淇淇水又東北西流水注之
 水出東大嶺下西流逕石樓南在北陵石上練垂桀立
 亭亭極峻其水西流水也又東逕馮都壘南世謂之淇
 陽城在西北三十里淇水又東出山分為二水水會立

石堰遏水以沃白溝左為菟水右則淇水自元甫城東
南逕朝歌縣北竹書紀年晉定公十八年淇絕于舊衛
即此也淇水又東屈而西轉逕頓邱北故闕駟云頓邱
在淇水南又屈逕頓邱西爾雅曰山一成謂之頓邱釋
名謂一頓而成邱無高下大小之殺也詩所謂送子涉
淇至于頓邱者也魏徙九原西河土軍諸胡置五軍於
邱側故其名亦曰五軍也吐京之名土軍五太和
吐京郡後徙其民于此故有
軍蓋吐京之變音太和
形志頓邱郡晉武帝置頓邱縣
太和併汲郡此必言頓邱郡廢置之由故有太和
二字太和為魏孝文帝年號朱氏僅知正其錯簡惜不
知指其
泉源水水有二源一水出朝歌城西北一出東
缺失也

南老人晨將渡水而沈吟難濟紂問其故左右曰老者
髓不實故畏寒也紂乃於此斲脛而視髓也其水南流

東屈逕朝歌城南晉書地道記曰本沫邑也詩云爰采

唐矣沫之鄉矣殷王武丁始遷居之為殷都也禹貢錐

指曰殷本紀曰武乙復去亳徙河北此即紂都朝歌也
武丁自鄴南復遷于亳至武乙則又自亳遷于朝歌淇
水注引晉書地道記謂武丁遷禹貢紂都在冀州大陸
居沫邑蓋誤以武乙為武丁耳

之野即此矣志一清按此句甚費尋思蓋抄變漢書地理

貢大陸澤在北紂所作沙邱臺在東北七十里酈氏率

筆書之今尚書具在烏有是耶史記殷本紀武乙立殷

復去亳徙河北蓋四世至紂不復再遷河北即朝歌也
杜佑曰衛縣西二十五里有古朝歌城劉昫曰紂所都

朝歌城在衛縣西今直隸大名府濬有糟邱酒池之事
縣河南衛輝府淇縣交界之地也

焉有新聲靡樂號邑朝歌晉灼曰史記樂書紂爲朝歌之音朝歌者歌不時也故墨子聞之惡而迴車不逕其邑論語撰考讖曰邑名朝歌顏淵不舍七十弟子掩目宰予獨顧由蹶墮車宋均曰子路患宰予顧視凶地故以足蹙之使墮車也今城內有殷鹿臺紂昔自投於火處也竹書紀年曰武王親禽帝受辛于南單之臺遂分天之明南單之臺蓋鹿臺之異名也武王以殷之遺民封紂子武庚于茲邑分其地爲三曰邶鄘衛使管叔蔡叔霍叔輔之爲三監叛周討平以封康叔爲衛箕子佯狂自悲故琴操有箕子操逕其墟父母之邦也不勝悲

作麥秀歌地居河淇之間後乃屬晉戰國時皆屬於趙男女淫縱有紂之遺風土嶮多寇漢以虞詡爲令朋友以難治致弔詡曰不遇盤根錯節何以別利器乎又東與左水合謂之馬溝水水出朝歌城北東流南屈逕其城東又東流與美溝合水出朝歌西北大嶺下東出逕駱駝谷於中逶迤九十曲故俗有美溝之日矣歷十二崿崿流相承泉響不斷返水捍注滄浚深隍隍間積石千通水穴萬變觀者若思不周賞情乏圖狀矣其水東逕朝歌城北又東南流注馬溝水又東南注淇水爲肥泉也故衛詩曰我思肥泉茲之永歎毛注云同出異歸

為肥泉爾雅曰歸異出同曰肥釋名曰本同出時所浸
 潤少所歸各枝散而多似肥者也犍為舍人曰水異出
 流行合同曰肥今是水異出同歸矣博物志謂之澳水
 詩云瞻彼淇澳棗竹猗猗毛云棗王芻也竹芻竹也漢
 武帝塞決河斬淇園之竹木以為用寇恂為河內伐竹
 淇川治矢百餘萬以益軍資今通望淇川無復此物唯
 王芻芻草不異毛興又言澳隈也鄭亦不以為津源而
 張司空專以為水流入于淇非所究也然斯水即詩所
 謂泉源之水也故衛詩云泉源在左淇水在右衛女思
 歸指以為喻淇水左右蓋舉水所入為左右也

一清案
 泉源水

入淇即今衛輝府輝縣之衛
 河也道元詳其水而逸其名淇水又南歷枋堰舊淇水

口東流逕黎陽縣界南入河地理志曰淇水出共東至
 黎陽入河溝洫志曰在遮害亭西一十八里至淇水口
 是也漢建安九年魏武王於水口下大枋木以成堰遏
 淇水東入白溝以通漕運故時人號其處為枋頭是以
 盧諶征艱賦曰後背洪枋巨堰深渠高隄者也自後遂
 廢魏熙平中復通之故渠歷枋城北東出今瀆破故堰
 其堰悉鐵柱木石參用其故瀆南逕枋城西又南分為
 二水一水南注清水水流上下更相通注河清水盛北
 入故渠自此始矣一水東流逕枋城南東與苑口合苑

水上承淇水於元甫城西北自石堰東苑城西屈逕其城南又東南流歷五軍東北得舊石洹故五水分流世號五穴口今惟通并爲二一水西注淇水謂之天井溝一水逕五軍東分爲蓼溝東入白祀陂又南分東入同山陂溉田七十餘頃二陂所結卽臺陰野矣苑水東南入淇水淇水右合宿胥故瀆瀆受河於頓邱縣遮害亭東黎山西北會淇水處立石堰遏水令更東北注魏武開白溝因宿胥故瀆而加其功也故蘇代曰決宿胥之口魏無虛頓邱卽指是瀆也淇水又東北流謂之白溝逕雍榆城南春秋襄公二十二年叔孫豹救晉次于雍榆

者也淇水逕其城東東北逕同山東又北逕其城東東北逕帝嚳冢西世謂之頓邱臺非也皇覽曰帝嚳冢在東郡濮陽頓邱城南臺陰野中者也又北逕白祀山東歷廣陽里逕顓頊冢西俗謂之殷王陵非也帝王世紀曰顓頊葬東郡頓邱城南廣陽里大冢者是也淇水又北逕頓邱縣故城西古文尙書以爲觀地矣蓋太康弟五君之號曰五觀者也竹書紀年晉定公三十一年城頓邱皇覽曰頓邱者城門名頓邱道世謂之殷皆非也蓋因邱而爲名故曰頓邱矣淇水東北逕枉人山東牽城西春秋左傳定公十四年公會齊侯衛侯于牽者也

杜預曰黎陽東北有牽城卽此城矣淇水又東北逕石柱岡東北注矣

又東過內黃縣南爲白溝

淇水又東北逕并陽城西世謂之辟陽城非也卽郡國

志所謂內黃縣有并陽聚者也白溝又北左合蕩水又

東北流逕內黃縣故城南縣右對黃澤郡國志曰縣有

黃澤者也地理風俗記曰陳畱有外黃故加內史記曰

趙廉頗伐魏取黃卽此縣

屈從縣東北與洹水合

白溝自縣北逕戲陽城東世謂之義陽郭

一清按後漢書光武帝紀

幸內黃大破五校於蕘陽降之章懷註云蕘陽聚名屬魏郡左傳云晉荀盈如齊逆女還卒於戲陽杜預註云

內黃縣北有戲陽城戲與蕘同義陽郭當作蕘陽聚說文蕘字下云墨翟書義从弗魏郡有蕘陽鄉讀若錡則

蕘與義字可通用也春秋昭公十年沈氏曰晉荀盈如齊逆女還

卒戲陽是也白溝又北逕高城亭又東洹水從西南來

注之又北逕問亭東卽魏界也魏縣故城應劭曰魏武

侯之別都也城內有武侯臺王莽之魏城亭也左與新

河合洹水枝流也白溝又東北逕銅馬城西蓋光武征

銅馬所築也故城得其名矣白溝又東北逕羅勒城東

又東北漳水注之謂之利漕口自下清漳白溝淇河咸

得通稱也

又東北過館陶縣北又東北過清淵縣西

白溝水又東北逕趙城西又北阿難河出焉蓋魏將阿

難所導一清按元和志云魏將李阿難以利衡瀆首有阿難之稱矣白

溝又東北逕空陵城西又北逕喬亭城西東去館陶縣

故城十五里縣即春秋所謂冠氏也魏陽平郡治也淇

水又屈逕其縣北又東北逕平恩縣故城東地理風俗

記曰縣故館陶之別鄉也漢宣帝元康三年置以封后

父許伯為侯國沈氏曰是地節三年封一清按宣帝地

元年病死無子絕元帝初元元年為元康廣漢以神爵

年紹封弟子嘉伯即廣漢也地理志王莽之延平縣

矣淇水又東過清淵縣故城西又歷縣之西北為清淵

故縣有清淵之名矣一清按漢志魏郡清淵縣應劭曰清河在西北世謂之魚

池城非也淇水又東北逕榆陽城北漢昭帝封太常江

德為侯國文穎曰邑在魏郡清淵一清按褚表作潦陽

漢表作潦陽侯江喜地理志清河無潦陽或是魏郡清

淵縣又褚表江德以捕淮陽反者公孫勇侯是武帝非

昭帝世謂之清淵城非也

又東北過廣宗縣東為清河

清河東北逕廣宗縣故城南順帝永元五年封皇太子

萬年為王國沈氏曰范史章八王少子廣宗殤王田融

萬歲以和帝永元五年封注未覈言趙立建興郡於城內置臨清縣於水東自趙石始也

清河之右有李雲墓雲字行祖甘陵人好學善陰陽舉

孝廉遷白馬令中常侍單超等立掖庭民女亳氏為后
 后家封者四人賞賜巨萬雲上書移副三府曰孔子云
 帝者諦也今尺一拜用不經御省是帝欲不諦乎帝怒
 下獄殺之後冀州刺史賈琮使行部過祠雲墓刻石表
 之今石柱尚存俗猶謂之李氏石柱清河又東北逕界
 城亭東水上有大梁謂之界城橋英雄記曰公孫瓚擊
 青州黃巾賊大破之還屯廣宗袁本初自往征瓚合戰
 于界橋南二十里紹將鞠義破瓚於界城橋斬瓚冀州
 刺史嚴綱又破瓚殿兵于橋上即此梁也世謂之鬲城
 橋蓋傳呼失實矣清河又東北逕信鄉縣故城西地理

風俗記曰甘陵西北十七里有信鄉故縣也清河又東
 北逕信成縣故城西應劭曰甘陵西北五十里有信成
 亭故縣也趙置水東縣於此城故亦曰水東城清河又

東北逕清陽縣故城西漢高祖置清河郡治此中二年
沈氏曰本表是三年景帝封皇子乘為王國王莽之平河也漢光

武建武二年西河鮮于冀為清河太守作公廨未就而
 亡後守趙高計功用二百萬五官黃秉功曹劉適言四
 百萬錢於是冀乃鬼見白日道從入府與高及秉等對
 共計校定為適秉所割匿冀乃書表自理其略言高貴

不尚節一清按太平廣記引畝壟之夫而箕踞遺類研

密失機婢妾其性媚世求顯偷竊銀艾鄙辱天官按一清

平廣記引水經作偷竊很鄙有辱天官易譏負乘誠高之謂臣不勝鬼言

謹因千里驛聞付高上之便西北去三十里車馬皆滅

不復見秉等皆伏地物故高以狀聞詔下還冀西河田

宅妻子焉兼為差代以旌一清按太平廣記引水經作弭幽中之訟漢

桓帝建和元年沈氏曰改清河為甘陵王國以王妖言

徙其年立甘陵郡治此焉

又東北過東武城縣西

清河又東北逕陵鄉西應劭曰東武城西南七十里有

陵鄉故縣也後漢封太僕梁松為侯國故世謂之梁侯

城遂立侯城縣治也清河又東北逕東武城縣故城西

史記趙公子勝號平原君以解邯鄲之功受封於此定

襄有武城故加東矣清河又東北逕復陽縣故城西漢

高祖七年封右司馬陳胥為侯國一清按陳胥所封索

隱曰是南陽地理志南陽郡復陽縣侯國然清河郡亦有復陽縣一清按方

輿紀要復陽城在棗彊縣西南十八里漢縣屬清河郡

後漢時省陸澄曰為枯絳水所湮此即陳胥之封邑非

南陽之復陽也南陽之復陽關駟曰故湖陽之樂鄉元

帝元延二年置安得以為王莽更名之曰樂歲地理風

俗記曰東武城西北三十里有復陽亭故縣也世名之

曰檻城非也清河水又東北流逕棗彊縣故城西史記

惠王子晏為侯國也應劭地理風俗記曰東武城西北五十里有棗疆城故縣也

又北過廣川縣東

清河北逕廣川縣故城南闕駟曰縣中有長河為流故曰廣川也水側有羌壘姚氏之故居也今廣川縣治清河又東北逕歷縣故城南地理志信都之屬縣也王莽更名曰歷寧也應劭曰廣川縣西北三十里有歷城亭故縣也今亭在縣東如北水濟尚謂之為歷口渡也

又東過脩縣南又東北過東光縣西

清河又東北左與張甲屯絳故瀆合阻深隄高障無復

有水矣又逕脩縣故城南屈逕其城東脩音條全氏曰三字注

中注王莽更名之曰脩治郡國志曰故屬信都清河又東

北左與橫漳枝津故瀆合又東北逕脩國一清按脩是縣名非國名

也道元故城東漢文帝封周亞夫為侯國故世謂之北

脩城也清河又東北逕邸閣城東城臨側清河晉脩縣

治城內有縣長魯國孔明碑清河又東至東光縣西南

逕胡蘇亭劉昭郡國志補注曰東光有者是一清按二胡蘇亭胡蘇河之名見爾雅字上下有

脫世謂之羌城非也又東北右會大河故瀆又逕東光

縣故城西後漢封耿純為侯國初平二年黃巾三十萬

入渤海公孫瓚破之於東光界追奔是水斬首三萬流

血丹水卽是水也

又東北過南皮縣西

清河又東北無棣溝出焉東逕南皮縣故城南又東逕

樂亭北地理志之臨樂縣故城也王莽更名樂亭晉書

地道志太康地記樂陵國有新樂縣卽此城矣又東逕

新鄉城北卽地理志高樂故城也王莽更之曰爲鄉矣

無棣溝又東分爲二瀆無棣溝又東逕樂陵郡北又東

屈而北出又東轉逕苑鄉縣故城南一清按此縣名不見兩漢晉魏史志

未詳處所又東南逕高成縣故城南與枝瀆合瀆上承無棣

溝南逕樂陵郡西又東南逕千童縣故城東史記建元

以來王子侯者年表曰故重也一作千鍾漢武帝元朔

四年封河間獻王子劉陰爲侯國應劭曰漢靈帝改曰

饒安也一清按史表千鍾侯劉搖一云劉陰索隱曰一作重漢表作重侯擔在平原地理志有重邱也

若勃海之千童別是一縣漢志注應劭曰靈帝改曰饒安者也道元混而一之滄州治枝瀆又

南東屈東北注無棣溝無棣溝又東北逕一故城北世

謂之功城也又東北逕鹽山東北入海春秋僖公齊楚

之盟於召陵也管仲曰昔召康公錫命先君太公履北

至于無棣蓋四履之所也京相璠曰舊說無棣在遼西

孤竹縣二說參差未知所定然管仲以責楚無棣在此

方之爲近既世傳以久且以聞見書之清河又東北逕

南皮縣故城西十三州志曰章武有北皮亭故此曰南皮也王莽之迎河亭史記惠景侯者年表云漢景帝後元中封孝文后兄子彭祖為侯國一清按史漢表竇彭祖與竇廣國皆以景帝後七年封非文帝也又文景改年只稱後元年後二年中元年中二年耳則亦不當云後元年中也後元非紀年之號此襲史表而誤者也他處引史漢建安中魏有年數者皆據史改正而特存其說于此武擒袁譚於此城也清河又逕北皮城東左會滹池別瀆謂之合口故謂之合城也地理風俗記曰南皮城北五十里有北皮城也

又東北過浮陽縣西

清河東北浮水故瀆出焉按史記趙之南界有浮水焉

浮水在南而此有浮陽之稱者蓋浮水出入津流同逆混并清漳二瀆河之舊道浮水故迹又自斯別是縣有浮陽之名也首受清河於縣界東北逕高成縣之苑鄉城北又東逕章武縣之故城北漢文帝後元中一清按此注誤

文說見前封孝文后弟竇廣國為侯國王莽更名桓章晉太始中立章武郡治此浮水故瀆又東逕篋山北魏土地

記曰高成東北五十里有篋山長七里浮瀆又東北逕柳縣故城南漢武帝元朔四年封齊孝王子劉陽為侯國地理風俗記曰高成縣東北五十里有柳亭故縣也

世謂之辟亭非也浮瀆又東北逕漢武帝望海臺一清按一

統志武帝臺在鹽山縣東北七十里水經注浮水所經蓋南臺也下章武縣臺乃是北臺又東注於

海應劭曰浮陽浮水所出入海潮汐往來日再今溝無

復有水也清河又北分爲二瀆枝分東出又謂之浮瀆

清河又北逕浮陽縣故城西王莽之浮城也建武十五

年更封驍騎將軍平鄉侯劉歆爲侯國浮陽郡治又東

北滹沱別瀆注焉謂之合口也

又東北過濊邑北

濊水出焉

又東北過鄉邑南

清河又東分爲二水枝津右出焉東逕漢武帝故臺北

魏土地記曰章武縣東一百里有武帝臺南北有二臺相去六十里基高六十丈俗云漢武帝東巡海上所築又東注於海清河又東北逕紵姑邑南俗謂之新城非也

又東北過窮河邑南

清河又東北逕窮河邑南俗謂之三女城非也東北至

泉周縣北入滹沱水經曰笥溝至泉周縣東南與清河

合者目爲清河下邑也又東泉周水出焉

又東北過漂榆邑入于海

清河又東逕漂榆邑故城南俗謂之角飛城趙記云石

勒使王述煮鹽於角飛卽城異名矣魏土地記曰高成縣東北一百里北盡漂榆東臨巨海民咸煮海水藉鹽爲業卽此城也清河自是入于海

蕩水出河內蕩陰縣西山東

何氏曰蕩廣韻作蕩从竹

蕩水出縣西石尙山東流逕其縣故城南縣因水以取名也晉伐成都王穎敗帝于是水之南盧紕四王起事曰惠帝征成都王穎戰敗時舉輦司馬八人輦猶在肩上軍人競就殺舉輦者乘輿頓地帝傷三矢百僚奔散唯侍中嵇紹扶帝士將兵之帝曰吾吏也勿害之衆曰受太弟命唯不犯陛下一人耳遂斬之血汗帝袂將洗

之帝曰嵇侍中血勿洗也此則嵇延祖殞命之所

又東北至內黃縣入于黃澤

美水出蕩陰西北韓大牛泉地理志曰縣之西山美水所出也美水又東逕韓附壁北又東流逕美城北故美里也史記音義曰牖里在蕩陰縣廣雅牖獄犴也夏曰夏臺殷曰美里周曰囹圄皆圜土昔殷紂納崇侯虎之言囚西伯於此散宜生南宮括見文王乃演易用明否泰始終之義焉美城北水積成淵方一十餘步深一丈餘東至內黃與防水會水出西山馬頭澗東逕防城北盧諶征艱賦所謂越防者也其水東南流注于美水又

東歷黃澤入蕩水地理志曰羨水至內黃入蕩者也蕩水又東與長沙溝水合其水導源黑山北谷東流逕晉鄙故壘北謂之晉鄙城名之為魏將城昔魏公子無忌矯奪晉鄙軍於是處故班叔皮遊居賦曰過蕩陰而弔晉鄙責公子之不臣者也其水又東謂之宜師溝又東逕蕩陰縣南又東逕枉人山東北至內黃縣右入蕩水亦謂之黃雀溝是水秋夏則泛春冬則耗其水又東逕內黃城南陳畱有外黃故稱內也東注白溝

洹水出上黨泜氏縣

水出洹山山在長子縣也

東過隆慮縣北

縣北有隆慮山昔帛仲理之所遊神也縣因山以取名漢高帝六年封周竈為侯國應劭曰殤帝曰隆故改從林也縣有黃華水出於神困之山黃華谷北崖上高十七里水出木門帶帶即山之第三級也去地七里縣水東南注壑直瀉巖下狀若雞翹故謂之雞翹洪蓋亦天台赤城之流也其水東流至谷口潛入地下東北一十里復出名柳渚渚周四五里是黃華水重源再發也東流葦泉水注之水出林慮山北澤中東南流與雙泉合水出魯般門東下流入葦泉水葦泉水又東南流注黃

華水謂之陵陽水又東入于洹水也虞氏世南北堂書鈔引水經注曰黃華谷內西洪邊有一洞深數丈去地千餘仞俗謂之聖人穴太平寰宇記引水經注云黃華谷西北有洞穴謂之聖水窟今本無之

又東北出山過鄴縣南

洹水出山東逕殷墟北竹書紀年曰盤庚卽位自奄遷于北蒙曰殷昔者項羽與章邯盟於此地矣洹水又東枝津出焉東北流逕鄴城南謂之新河又東分爲二水北水逕東明觀下昔慕容儁夢石虎齧其臂寤而惡之購求其尸而莫知之後宮嬖妾言虎葬東明觀下於是掘焉下度三泉得其棺剖棺出尸尸僵不腐儁罵之曰

死胡安敢夢生天子也使御史中尉陽約數其罪而鞭之此蓋虎始葬處也又北逕建春門石梁不高大治石工密舊橋首夾建兩石柱螭矩趺勒甚佳乘輿南幸以其作制華妙致之平城東側西闕北對射堂淥水平潭碧林側浦可遊憩矣淇水際其西逕魏武元武故苑苑舊有元武池以肄舟楫有魚梁釣臺竹木灌叢今池林絕滅略無遺跡矣其水西流注于漳南水又東北逕女

亭城北又東北逕高陵城南東合垆溝又東逕鸕鷀陂

黃衣水注之北與台陂水合陂東西三十里南北一清按

有脫注白溝河溝上承洹水北絕新河北逕高陵城東

又北逕斥邱縣故城西縣西南角有斥邱蓋因邱以氏縣故乾侯矣春秋經書昭公二十八年公如晉次于乾侯也漢高帝六年封唐厲為侯國王莽之利邱矣又屈逕其城北東北流注于白溝洹水自鄴東逕安陽縣故城北徐廣晉紀曰石遵自李城北入斬張豺于安陽是也魏土地記曰鄴城南四十里有安陽城城北有洹水東流者也洹水又東至長樂縣左側白溝出焉洹水又東逕長樂縣故城南按晉書地理志曰魏郡有長樂縣也

又東過內黃縣北東入于白溝

洹水逕內黃縣北東流注于白溝世謂之洹水也許慎

說文呂忱字林竝云洹水出晉魯之間

一清按俗本說文作齊魯之間

當以此注正之

昔聲伯夢涉洹水或與其瓊瓌而食之泣而又

為瓊瓌盈其懷矣從而歌曰濟洹之水贈我以瓊瓌歸乎歸乎瓊瓌盈吾懷乎後言之之暮而卒即是水也



水經注釋卷九終

水經注釋卷十

仁和趙一清誠夫錄

濁漳水

清漳水

補滏水

補洛水

濁漳水出上黨長子縣西發鳩山

漳水出鹿谷山與發鳩連麓而在南淮南子謂之發苞山故異名互見也左則陽泉水注之右則散蓋水入焉三源同出一山但以南北為別耳

東過其縣南

又東堯水自西山東北流逕堯廟北又東逕長子縣故

城南周史辛甲所封邑也春秋襄公十八年晉人執衛東行人石買於長子卽是縣也秦置上黨郡治此也其水

東北流入漳水漳水東會于梁水梁水南出梁山北流

逕長子縣故城南竹書紀年曰梁惠成王十二年鄭取

屯畱尚子涅尚子卽長子之異名也梁水又北入漳水

屈從縣東北流

陶水南出陶鄉北流逕長子城東西轉逕其城北東注

于漳水

又東過壺關縣北

漳水東逕屯畱縣南又屈逕其城東東北流有絳水注

之絳水西出穀遠縣東之發鳩谷又有一水西出穀遠

縣爲濫水也東逕屯畱縣故城南故畱吁國也潞氏之

屬春秋襄公十八年晉人執孫蒯于純畱是也其水東

北流入于漳故桑欽云絳水出屯畱西南東入漳禹貢

曰宋張埴云降水卽濁漳也字或作絳地理志上黨郡

屯畱縣下云桑欽言絳水出西南東入海酈道元引此

文作入漳一清按後鉅鹿縣下引地理志信都國信都

縣下班固原文云入海則此漳字明是道元所改也觀

其自相詰難知之以絳水爲入漳絳瀆爲入海然絳瀆

自是漳水一時之徙流非禹貢之絳水蓋班志之誤道

元未敢頌言之漳水又東凍水注之水西出發鳩山東逕余吾

縣故城南漢光武建武六年封景丹子尚爲侯國凍水

又東逕屯畱縣故城北竹書紀年梁惠成王元年韓共

侯趙成侯遷晉桓公于屯畱史記趙肅侯奪晉君端氏而徙居之此矣其水又東流注于漳故許慎曰水出發鳩山入河從水東聲也漳水又東北逕壺關縣故城西又屈逕其城北故黎國也有黎亭縣有壺口關故曰壺關矣呂后元年立孝惠後宮子武為侯國漢有壺關三老公乘興厄林曰漢書戾太子傳作壺關三老茂顏師古曰荀悅漢紀作令狐茂今漢紀無而白帖引上黨郡記曰漢史稱壺關三老令狐茂然漢武故事曰壺關三老鄭茂上書未知誰信又漢書王尊傳有湖三老公乘興上書訟王尊治京兆功效善長以茂為興大誤一清按王伯厚曰今漢紀脫令狐茂三字又御覽引上黨郡記令狐徵君上書訟衛太子即邑人也縣在隱城東山中疑即茂也屯畱東不得先壺關而後屯畱也漳水歷鹿臺山與銅

鞮水合水出銅鞮縣西北石磴山

一清按太平寰宇記銅鞮縣下引水經注

云銅鞮水出覆釜山經襄垣縣道又石梯山下引水經注云銅鞮縣有石梯山高一千九百尺今本無之魏書地形志鄉郡銅鞮縣有銅鞮城石梯水東行入漳然則銅鞮水即石梯水而石梯山亦疑即石磴山也東

流與專池水合水出八特山東北流入銅鞮水銅鞮水

又東南逕女

一清按下有脫文

諫水西北出好松山

一清按太平寰宇記

上黨縣有八諫水引水經云諫水源出上黨縣西魏書地形志上黨郡寄氏縣有八禮泉上黨谷即八諫水也

東南流北則葦池水與公主水合而右注之南則榆交

水與皇后水合而左入焉亂流東南注于銅鞮水銅鞮

水東逕李熹墓前有碑碑石破碎故李氏以太和元年

立之其水又東逕故城北城在山阜之上下臨岫壑東

西北三面岨表二里世謂之斷梁城卽故縣之上虎亭也銅鞮水又東逕銅鞮縣故城北城在水南山中晉大夫羊舌赤銅鞮伯華之邑也漢高祖破韓王信於此縣也銅鞮水又東南流逕頃城西卽縣之下虎聚也地理志曰縣有上虎亭下虎聚者也銅鞮水又南逕胡邑西又東屈逕其城南又東逕襄垣縣入于漳漳水又東北流逕襄垣縣故城南王莽之上黨亭

又東北過屯留縣南潞縣北縣故赤翟潞子國也其相酆舒有僞才而不以茂德晉伯宗數其五罪使荀林父滅之闕駟曰有潞水爲冀州

浸卽漳水也余按燕書王猛與慕容評相遇於潞川也評鄣固山泉鬻水與軍入絹匹水二石無佗大川可以爲浸所有巨浪長湍唯漳水耳故世人亦謂濁漳爲潞水矣縣北對故臺壁漳水逕其南本潞子所立也世名之爲臺壁也慕容垂伐慕容永於長子軍次潞川永率精兵拒戰阻河自固垂陣臺壁一戰破之卽是處也漳水於是左合黃須水口水出臺壁西張諱巖下世傳巖赤則土離兵害故惡其變化無常恒以石粉汙之令白是以俗目之爲張諱巖其水南流逕臺壁西又南入于漳漳水又東北歷望夫山山之南有石人竚於山上狀

有懷於雲表因以名焉有涅水西出覆甌山而東流與西湯溪水合水出涅縣西山湯谷五泉俱會謂之五會之泉交東南流謂之西湯水又東南流注涅水又東逕涅氏縣故城南縣氏涅水也東與白鷄水合水出縣之西山東逕其縣北東南流入涅水涅水又東南武鄉水會焉水源出武鄉山西南逕武鄉縣故城西而南得清谷口水源出東北長山清谷西南與鞞鞞白壁二水合南入武鄉水又南得黃水口黃水三源同注一壑東南流與隱室水合水源西北出隱室山東南注黃水又東入武鄉水武鄉水又東南注于涅水涅水又東南流注

于漳水漳水又東逕礪陽城北倉谷水入焉水出林慮縣之倉谷溪東北逕魯般門西闕昂藏石壁霞舉左右結石修防崇基仍存北逕偏橋東卽林慮之嶠嶺抱犢固也石磴西陞陟躡修上五里餘嶠路中斷四五丈中以木爲偏橋劣得通行亦言故有偏橋之名矣自上猶須攀蘿捫葛方乃自臻山頂卽庾袞眩墜處也倉谷溪水又北合白木溪溪水出壺關縣東白木川東逕百畝城北蓋同仇池百頃之稱矣又東逕林慮縣之石門谷又注于倉溪水倉溪水又北逕礪陽城東而北流注于漳水漳水又東逕葛公亭北而東去矣

又東過武安縣南

漳水於縣東清漳水自涉縣東南來流注之世謂決入

之所為交漳口也

全氏曰按地理志則是濁漳入清漳清漳入河不如酈言杜君卿曰清漳

今為濁漳所奪李宏憲曰清不勝濁故也

又東出山過鄴縣西

漳水又東逕三戶峽為三戶津張晏曰三戶地名也在

梁期西南孟康曰津峽名也在鄴西四十里

一清按裴駙史記集

解引張說梁期作梁淇引孟說四十里作三十里詳見下

又東汙水注之水出武安

縣山東南流逕汙城北昔項羽與蒲將軍英布濟自三

戶破章邯于是水汙水東注于漳水漳水又東逕武城

南世謂之梁期城梁期在鄴北俗亦謂之兩期城皆為

非也司馬彪郡國志曰鄴縣有武城武城即期城矣

一清

按梁期城在鄴北而三戶津在鄴西漳水先逕武城而後梁期武城一名期城與梁淇地望相近善長故以俗傳為非矣漳水又東北逕西門豹祠前祠東側有碑隱起為

字祠堂東頭石柱勒銘曰趙建武中所修也魏文帝述

征賦曰羨西門之嘉迹忽遙睇其靈宇漳水右與枝水

合

全氏曰漢志魏郡武始縣漳水東至邯鄲入漳指此水也然漳水入漳其說不甚分明當如張晏所云漳

水之別注云枝水蓋本之晏也其水上承漳水於邯會西而東別與邯

水合水發源邯山東北逕邯會縣故城西北注漳水故

曰邯會也張晏曰漳水之別自城西南與邯山之水會

今城旁猶有溝渠存焉漢武帝元朔二年封趙敬肅王子劉仁為侯國其水又東北入于漳昔魏文侯以西門豹為鄴令也引漳以溉鄴民賴其用其後至魏襄王以史起為鄴令又堰漳水以灌鄴田咸成沃壤百姓歌之魏武王又塌漳水迴流東注號天井堰二十里中作十二澄澄相去三百步令互相灌注一源分為十二流皆懸水門陸氏鄴中記云水所溉之處名曰晏陂澤故左思之賦魏都也謂澄流十二同源異口者也魏武之攻鄴也引漳水以圍之獻帝春秋曰司空鄴城圍周四十里初淺而狹如或可越審配不出爭利望而笑之司空

一夜增修廣深二丈引漳水以注之遂拔鄴本齊桓公所置也故管子曰築五鹿中牟鄴以衛諸夏也後屬晉

魏文侯七年始封此地故曰魏也一清按左傳閔公元

為大夫卜偃曰魏大名也史記魏世家晉獻公之十六年也文侯乃桓子之孫蓋畢萬之後索隱曰系本桓子生文侯斯其傳云孺子疵是魏駒之子與此系代亦不同也今注云文侯始封此地獨不記詩之魏風乎蓋誤證也漢高帝十二年置魏郡治鄴縣王莽更名魏城後分

魏郡置東西部都尉故曰三魏魏武又以郡國之舊引

漳流自城西東入逕銅雀臺下伏流入城東注謂之長

明溝也渠水又南逕止車門下魏武封於鄴為北宮宮

有文昌殿溝水南北夾道枝流引灌所在通溉東出石

竇堰下注之洹水故魏武登臺賦曰引長明灌街里謂此渠也石氏於文昌故殿處造東西太武二殿於濟北穀城之山採文石爲基一基下五百武直宿衛屈柱跌瓦悉鑄銅爲之金漆圖飾焉又徙長安洛陽銅人置諸宮前以華國也城之西北有三臺皆因城爲之基巍然崇舉其高若山建安十五年魏武所起平坦略盡春秋古地云葵邱地名今鄴西三臺是也謂臺已平或更有見意所未詳中曰銅雀臺高十丈有屋百餘間臺成命諸子登之並使爲賦陳思王下筆成章美捷當時亦魏武望奉常王叔治之處也昔嚴才與其屬攻掖門修聞

變車馬未至便將官屬步至宮門太祖在銅雀臺望見之曰彼來者必王叔治也相國鍾繇曰舊京城有變九卿各居其府卿何來也修曰食其祿焉避其難居府雖舊非赴難之義時人以爲美談矣其後石虎更增二丈立一屋連棟接榱彌覆其上盤迴隔之名曰命子窟又於屋上起五層樓高十五丈去地二十七丈又作銅雀於樓巔舒翼若飛南則金虎臺高八丈有屋一百九間北曰冰井臺亦高八丈有屋一百四十間上有冰室室有數井井深十五丈藏冰及石墨焉石墨可書又然之難盡亦謂之石炭又有粟窖及鹽窖以備不虞今窖上

猶有石銘存焉左思魏都賦曰三臺列峙而崢嶸者也城有七門南曰鳳陽門中曰中陽門次曰廣陽門東曰建春門北曰廣德門次曰廡門西曰金明門一曰白門鳳陽門三臺洞開高三十五丈石氏作層觀架其上置銅鳳頭高一丈六尺東城上石氏立東明觀觀上加金博山謂之鏘天北城上有齊斗樓超出羣榭孤高特立其城東西七里南北五里飾表以塼百步一樓凡諸宮殿門臺隅雉皆加觀榭層薨反宇飛檐拂雲圖以丹青色以輕素當其全盛之時去鄴六七十里遠望若亭巍若仙居魏因漢祚復都洛陽以譙爲先人本國許昌爲

漢之所居長安爲西京之遺迹鄴爲王業之本基故號五都也今相州刺史及魏郡治漳水自西門豹祠北逕趙閱馬臺西基高五丈列觀其上石虎每講武於其下升觀以望之虎自於臺上放鳴鏑之矢以爲軍騎出入之節矣漳水又北逕祭陌西戰國之世俗巫爲河伯取婦祭於此陌魏文侯時西門豹爲鄴令約諸三老曰爲河伯取婦幸來告知吾欲送女皆曰諾至時三老廷掾賦斂百姓取錢百萬巫覡行里中有好女者咒當爲河伯婦以錢三萬聘女沐浴脂粉如嫁狀豹往會之三老巫掾與民咸集赴觀巫嫗年七十從十女弟子豹呼婦

視之以爲非妙令巫嫗入報河伯投巫于河中有頃曰
 何久也又令三弟子及三老入白並投於河豹磬折曰
 三老不來奈何復欲使廷掾豪長趣之皆叩頭流血乞
 不爲河伯取婦淫祀雖斷地畱祭陌之稱焉又慕容儁
 投石虎尸處也田融以爲紫陌也趙建武十一年造紫
 陌浮橋于水上爲佛圖澄先造生墓於紫陌建武十五
 年卒十二月葬焉卽此處也漳水又一清按鄴中記曰
苑有宮臨漳水對趙氏臨漳宮宮在桑梓苑多桑木故
又下疑落南字苑有其名三月三日及始蠶之月虎帥皇后及夫人採
 桑於此今地有遺桑墉無尺雉矣漳水又北濫水入焉

漳水又東逕梁期城南地理風俗記曰鄴北五十里有

梁期城故縣也

一清按史記項籍本紀注引張晏說作梁淇索隱曰淇當作湛晉八王故事云

王浚伐鄴前至梁湛蓋梁湛在鄴西四十里闕駟十漢三州志云鄴北五十里梁期城故縣也蓋本之應劭

武帝元鼎五年封任破胡爲侯國晉惠帝永興元年驃
 騎王浚遣烏丸渴末逕至梁期候騎到鄴成都王穎遣
 將軍石超討末爲末所敗於此又逕平陽城北竹書紀
 年曰梁惠成王元年鄴師敗邯鄲之師于平陽者也司
 馬彪郡國志曰鄴有平陽城卽此地也

又東過列人縣南

漳水又東右逕斥邱縣北卽裴縣故城南王莽更名之

曰卽是也地理風俗記曰列人縣西南六十里有卽裴城故縣也漳水又東北逕列人縣故城南王莽更名之爲列治也竹書紀年曰梁惠成王八年惠成王伐邯鄲取列人者也于縣右合白渠故瀆白渠水出魏郡武安縣欽口山東南流逕邯鄲縣南又東與拘澗水合水導源武始東山入白渠北俗猶謂是水爲拘河也白渠水又東又有牛首水入焉水出邯鄲縣西堵山東流分爲二水洪湍雙逝澄映兩川漢景帝時六國悖逆命曲周侯酈寄攻趙圍邯鄲相捍七日漢書趙幽王友酈商二傳俱作七月此文誤也引牛首拘水灌城城壞王自殺其水東入邯鄲城逕溫

明殿南漢世祖擒王郎幸邯鄲晝臥處也其水又東逕叢臺南六國時趙王之臺也郡國志曰邯鄲有叢臺故劉劭趙都賦曰結雲閣於南宇立叢臺於少陽者也今遺基舊墉尙在其水又東歷邯鄲阜張晏所謂邯山在東城下者也曰單盡也城郭從邑故加邑邯鄲之名蓋指此以立稱矣故趙郡治也長沙耆舊傳稱桓楷爲趙郡太守嘗有遺囊粟於路者行人挂囊粟於樹莫敢取之卽於是處也其水又東流出城又合成一川也又東

澄而爲渚沁水

全氏曰顧景范曰今城南五里有渚河城西半里有沁河合流爲西河蓋是二

水東南流注拘澗水

漢志魏郡武始拘澗水東北至邯鄲入白渠

又東入白

渠漢志趙國邯鄲縣堵山牛首水所出東入白渠又東故瀆出焉一水東為澤

渚曲梁縣之雞澤也國語所謂雞邱矣東北通澄湖白

渠故瀆南出所在枝分右出即邯溝也歷邯溝縣故城

東蓋因溝以氏縣也地理風俗記曰即裴城西北二十

里有邯溝城故縣也又東逕肥鄉縣故城北竹書紀年

曰梁惠成王八年伐邯鄲取肥者也晉書地道記曰太

康中立以隸廣平也渠道交徑互相纏縻與白渠同歸

逕列人右會漳津今無水地理志曰白渠東至列人入

漳是也

又東北過斥漳縣南

應劭曰其國斥鹵故曰斥漳漢獻帝建安十八年魏太

祖鑿渠引漳水東入清洹以通河漕名曰利漕渠漳津

故瀆水舊斷溪東北出涓流瀦注而已尚書所謂覃懷

底績至於衡漳者也孔安國曰衡橫也言漳水橫流也

又東北逕平恩縣故城西應劭曰縣故館陶之別鄉漢

宣帝元康三年置以封后父許伯為侯國一清按許伯

篇館陶縣下注此復出是地節三年王莽更曰延平也

又東北過曲周縣東又東北過鉅鹿縣東

衡漳故瀆東北逕南曲縣故城西地理志廣平有南曲

縣應劭曰平恩縣北四十里有南曲亭故縣也又逕曲

周縣故城東地理志曰漢武帝建元四年置王莽更名

直周余按史記大將軍酈商以高祖六年封曲周縣為

侯國又考漢書同全氏曰五字注中注是知曲周舊縣非始孝武

蓋商孫氏潛曰蓋商下有缺文下文注云冀州人在縣市補履數十年云云是列仙傳嘯父事非酈商也

冀州人在縣市補履數十年人奇其不老求其術而不

能得也衡漳又北逕巨橋柢閣西舊有大梁衡水故有

巨橋之稱昔武王伐紂發巨橋之粟以賑殷之飢民服

虔曰巨橋倉名許慎曰鉅鹿水之大橋也今臨側水湄

左右方一二里中狀若邱墟蓋遺囿故窖處也衡水又

北逕鉅鹿縣故城東應劭曰鹿者林之大者也尚書曰

堯將禪舜納之大麓之野烈風雷雨不逃致之以昭華

之玉而縣取目焉一清按此是緯書路溫舒縣之東里人父為

里監門使溫舒牧羊澤中取蒲牒用寫書即此澤也鉅

鹿郡治秦始皇二十五年滅趙以為鉅鹿郡漢景帝中

元年為廣平郡武帝征和三年以封趙敬肅王子為廣

平侯國一清按漢志鉅鹿郡秦置又廣平國武帝征和二年置為平于國宣帝五鳳二年復故莽曰富

昌蓋郡國竝列不得如酈所言又沈氏曰敬肅王子偃

以征和二年立為平于王即廣平也然是王國非侯國

善長世祖中興更為鉅鹿也一清按續志鉅鹿郡劉昭補註云建武十三年省廣

平國以其縣屬非更廣平為鉅鹿也或曰為乃屬字之誤鄭元注尚書引地說云大

在鉅鹿一清按漢志鉅鹿郡鉅鹿縣下云禹貢大鹿澤在北與康成說同地理志曰水

在安平信都全氏曰此地理志非班志安帝改信都曰安平則是安帝以後之書一清按全說是

孔穎達尚書正義曰地理志云降水在信都案班固漢書以襄國為信都云云則知此地理志非班志明矣然

漢志信都國信都縣下云禹貢絳水亦入海而趙國襄國下不及絳水孔氏之云未知所指桑欽亦有地理志

上黨郡屯留下引桑欽言或是也鉅鹿與信都相去不容此數也水土

之名變易世失其處見降水則以為絳水故依而廢讀

或作絳字非也今河內共北山淇水共水出焉東至魏

郡黎陽入河近所謂降水也降讀當如郟降于齊師之

降蓋周時國于此地者惡言降故改云共耳又今河所

徙去大陸遠矣館陶北屯氏河其故道與余按鄭元據

尚書有東過洛汭至于大伾北過降水至于大陸推次

言之故以淇水為降水共城為降城所未詳也稽之羣

書共縣本共和之故國是有其名不因惡降而更稱禹

著山經淇出沮洳淇澳衛詩列目又遠當非改絳革為

今號但是水導源共北山元欲因成降義故以淇水為

降水耳即如元引地說黎陽鉅鹿非千里之逕直信都

於大陸者也唯屯氏北出館陶事近之矣按地理志云

絳水發源屯留下亂漳津是乃與漳俱得通稱故水流

閒關所在著目信都復見絳名而東入于海尋其川脈

無他殊瀆而衡漳舊道與屯相亂乃書有過降之文地

說與一清按千里之誌卽之途致與書相鄰河之過降

當應此矣下至大陸不異經說自甯迄于鉅鹿出于東

北皆爲大陸語之纏絡厥勢眇矣九河旣播八枝代絕

遺迹故稱往往時存故鬲般列于東北徒駭瀆聯漳絳

同逆之狀粗分陂障之會猶在案經考瀆自安故目矣

禹貢錐指曰冀州疏曰春秋魏獻子田于大陸焚焉還

卒于甯杜氏嫌鉅鹿絕遠以爲汲郡修武縣吳澤也甯

卽修武然此二澤相去甚遠所以得爲大陸者以爾雅

廣平曰陸但廣而平者則名大陸故異所而同名焉此

說允當修武今獲嘉縣西北有吳澤陂其旁近地卽

大陸也水經濁漳注曰鄭元注尚書引地說云大河東

北流過絳水千里至大陸爲地腹今淇水東至黎陽入

河近所謂絳水蓋以淇口應北過降水之文也道元疑

之曰黎陽鉅鹿非千里之逕是矣而其下又云自甯迄

於鉅鹿出于東北皆爲大陸則以南北兩大陸聯爲一

地以應千里之數何其無定見也信如酈言則淇口在

黎陽西南距修武二百餘里河之所經當先大陸而後

降水矣鄭說亦豈可通乎又曰正義曰地理志降水在

信都縣漢以襄國爲信都在大陸之西或降水發源在

此下尾至今之信都故得先過降水乃至大陸鄭以降

讀爲下江反聲轉爲共河內共縣淇水出焉東至魏郡

黎陽縣入河此近降水周時國于此地者惡言降故謂

之共此鄭胸臆不可從也按襄國今爲邢臺縣界絕無

降源孔說非是酈注濁漳引鄭元尚書注言降水字不

當作絳是也而讀降爲廓降于齊師之降以淇水爲降

水共城爲降城則繆一清按道元極辨康成降水共城

之失未嘗附和雷同東樵規之似未允當惜河水篇注

脫去釋禹貢北過降水之漳水又歷經縣故城西水有

文大致不明啓人疑惑耳

故津謂之薄落津一清按續志安平國經西有漳水津

陽縣下云嘗分爲涇縣涇卽經蓋前漢已置是縣旋廢

而後漢復置之又方輿紀要趙州寧晉縣有楊氏廢縣

云周禮職方冀州藪曰楊紆水經注楊紆卽大陸澤或

曰古有楊城澤流紆迴城下因曰楊紆漢置楊氏縣治

水經注

卷十

五

東潛趙氏定本

焉又云胡盧河在縣東南二十里即禹貢之大陸澤呂氏春秋九藪趙之大陸其一也酈道元以為即楊紆藪亦謂之薄落水亦謂之廣阿澤其上流即漳水也自順德府南和任縣達隆平而東北匯大小羣川以注于縣境而趙州西境及滹沱河以南諸水亦悉東南流至縣境匯為大澤每至夏秋之交霖潦為患則漳水滹沱南北交注泛濫甚廣東注深冀及阜城獻縣以東至交河縣而合于滹沱丁度曰胡盧河橫漳之別名也冀北之大川胡盧河其最矣宛溪去今未遠所引水經注今本無之蓋從他書採錄耳漢志冀州藪曰楊紆師古曰爾雅曰秦有楊紆而此以為冀州未詳其義及所在也楊紆爾雅作楊陟郭璞註云今在扶風汧縣西邢昺疏曰周禮雍州澤藪曰弦蒲即此楊陟蓋相承之繆也道元河水注云高誘以為楊紆秦藪非也楊紆不屬雍州則當屬冀方矣足正羣說之失也呂氏春秋云秦之陽華或者以陽華為楊陟乎然禹貢曰九澤既陂爾雅乃有十藪周秦同域周有焦穫秦有楊紆是多一澤矣呂覽淮南仍作九藪或以州言或以國言雖各不同要是九而非昔袁本初還自易京上巳屆此率其賓從後漢書十

徒作賓禊飲於斯津矣衡漳又逕沙邱臺東紆所成也在

鉅鹿故城東北七十里趙武靈王與秦始皇並死於此

矣又逕銅馬祠東漢光武廟更始三年秋光武追銅馬

於館陶大破之遂降之賊不自安世祖令其歸營乃輕

騎行其壘賊乃相謂曰蕭王推赤心置人腹中安得不

投死乎遂將降人分配諸將眾數十萬人故關西號世

祖曰銅馬帝也祠取名焉廟側有碑述河內修武縣張

導字景明以建和三年為鉅鹿太守一清按建和漢和帝年號張景明為

袁紹說冀州牧韓馥讓位事在獻帝初平二年相距四

十餘年不應如是之久建和字誤當作建安魏書臧洪傳云洪荅陳琳書曰昔張景明親登壇啣血奉辭奔走卒使韓牧讓節主人得地然後但以拜章朝主賜爵獲

傳之故旋時之間不蒙觀過之貸而受夷滅之漳津汎
 禍則景明作郡宜在建安初年而亦為紹所殺
 濫土不稼穡導披按地圖與丞彭參掾馬道嵩等原其
 逆順揆其表裏修防排通以正水路功績有成民用嘉
 賴題云漳河神壇碑而俗老者儒猶揭斯廟為銅馬劉
 神寺是碑頃因震裂餘半不可復識矣又逕南宮縣故
 城西漢惠帝元年沈氏曰是以封張越人子買為侯國
 王莽之序中一清按漢志作序下也按全氏曰此下有
 出焉五字列葭水即長蘆淫水也愚謂非也此處無脫
 誤列葭水漢志注于南和南和在經縣之西南乃其上
 游也長蘆水水經注始見于列人列人今肥鄉由肥鄉
 而曲周而廣宗廣宗漢經縣而南宮而堂陽以達於信
 都至下博列葭水注之在今深州之域長蘆水至經縣
 為薄落津續志鉅鹿郡瘦陶有薄落亭可知其水亦注

寧晉泊中矣據道元注薄落津有長蘆淫水之稱至堂
 陽乃變列葭之名若此云列葭水出焉又云列葭水
 注之于義豈可通乎近代復以衡漳為胡盧河宋史河
 渠志云胡盧河源于西山即今廣平順德二府以
 西之山在漢為鉅鹿郡廣平國地葭水至深州合于胡
 盧河而長蘆本有薄落之稱故後世變呼為胡盧漢志
 有列葭無長蘆固知其水與馮醴通為衡津一清按太
 長蘆之即絳水也
 邢州龍岡縣下云馮水一名澧水俗謂之百泉水出縣
 東平地以其導源總納眾泉合成一川故也亦謂之鴛
 鴦水魏都賦所云鴛鴦交合當作交谷劉良曰鴛鴦水
 在南和縣西交谷水在鄴南又南和縣下引水經注云
 北有和城縣故此云南也鴛鴦水在縣北五里水經注
 云南和城西官治東有便水一名鴛鴦水又沙河縣下
 沙河即馮水也水經此句下有東過沙河縣五字宋白曰沙河
 鑑注引水經此句下有東過沙河縣五字宋白曰沙河
 即馮水也漢志趙國襄國渠水所出東北至任入淺又
 有蓼水馮水皆東至朝平入馮師古曰馮音藕又音牛
 吼反說文馮水出趙國襄國之西山東北入淺渠水字
 誤淺即漳也列子牛缺下之邯鄲遇盜于耦沙之中即

濁水也又龍岡縣下云蓼水一名達活水水經云蓼水
 出襄國西石井岡岡上有井大如車輪按朱氏弁曲洧
 舊聞云去鉅鹿郡西北一舍有泉水經名達活源流深
 長廣輪數百步享其利又內邱縣下引水經云中邱有
 蓬鵲之山按全氏曰漢志常山郡中邱縣蓬山長谷諸
 水所出東至張邑入濁說文亦云水出中邱蓬山長谷
 即蓬鵲之山也諸水是渚水之誤入濁是入濁之誤內
 邱有渚水亦名礪水張縣後省入任縣其地一名曰渚
 陽城城在渚水之陽也晉書段疾陸眷攻石勒屯渚陽
 即此又龍岡縣下引水經云鵲山有穴出雲母其西有
 龍騰溪鶴渡嶺按太平御覽引水經注曰石勒時大旱
 沙門佛圖澄于石井岡掘得死龍長尺餘漬之以水良
 久乃蘇咒而祭之龍騰而上天即雨降又有長蘆淫水
 因名龍岡凡此諸所引文今本皆無之
 之名絳水之稱矣今漳水既斷絳水非復纏絡矣又北
 絳瀆出焉今無水故瀆東南逕九門城南又東南逕南
 宮城北又東南逕繚城縣故城北十三州志曰經縣東

五十里有繚城故縣也左逕安城南故信都之安城鄉
 也更始二年和城太守邳彤全氏曰按後漢書光武帝
 舉郡降注引東觀記曰王莽分鉅鹿為和戎郡卒正邳彤亦
 如太守邳彤傳亦作成字注又引東觀記為證太守之
 稱善長之與上會信都南安城鄉上大悅即此處也故
 率筆耳

瀆又東北逕辟陽亭漢高帝六年封審食其為侯國清一
 按漢書張陳王周傳云辟陽近淄川疑非趙地審食其
 封邑當是洸水篇之辟陽城城陽頃王子節侯壯亦封
 辟土侯是也王莽之樂信也地理風俗記曰廣川西南六十

里有辟陽亭故縣也絳瀆又北逕信都城東散入澤渚
 西至于信都城東連于廣川縣之張甲故瀆同歸于海
 故地理志曰禹貢絳水在信都東入于海也禹貢錐指
 曰漢志雜

採古記故漳絳二水竝存實一川也漳絳本入河及河
 徙之後漳絳循河故道而下故鄆元云水流開關所在
 著稱信都復見絳名而東入于海也然漢志信都之絳
 水則又有別志云故漳河在北東入海禹貢絳水亦入
 海蓋縣北故漳即禹河之故道而絳水出其南則漳水
 之徙流鄆元之所謂絳瀆者也蓋漢時信都之漳水徙
 從其縣南故地志以此為絳水而目縣北之瀆曰故漳
 河其後漳又復北道故水經敘漳水仍自信都縣西東
 北過下博縣而鄆元云絳瀆今無水唐人遂謂之枯涇
 通典云清河郡經城縣界有枯涇渠北入信都郡界是
 也此渠乃漳水一時之徙流漢志以為禹貢之絳水大
 繆而杜佑據以分冀兗之界自後說經者動稱枯涇以
 證導河之所過皆班固禹貢二字誤之也

又北過堂陽縣西

衡水自堰分為二水其一水北出經縣故城西世祖自
 信都以四千人先攻堂陽降水者也水上有梁謂之旅

津渡商旅所濟故也其右水東北注出石門門石崩禡

餘基殆在謂之長蘆水蓋變列葭之名也

太平寰宇記
滄州清池縣

下引水經云長蘆水出列人縣以其水傷多蘆葦故名
 今本無之一清按太平寰宇記邢州南和縣下云列家
 水在縣西南十里下至狼溝河今邢臺沙河南和之界
 有東西狼河即百泉之支流下流入澧亦謂之小澧河
 即注上云其水與澧通為衡津者也樂史所云與漢
 志合是沙邱堰以下後人又有長蘆之一稱而道元下
 文仍以列葭
 之名歸之

長蘆水東逕堂陽縣故城南應劭曰縣在
 堂水之陽穀梁傳曰水北為陽也今於縣故城南更無
 別水唯是水東出可以當之斯水蓋包堂水之兼稱矣

長蘆水又東逕九門陂故縣也

一清按九門陂在漢九
 門縣陂即縣以受氏九

門本趙邑見史記趙世家漢為縣屬常山郡後漢晉因
 之後魏徙常山郡治此北齊廢自漢迄拓跋朝無省併

之事道元云故縣中間必有遷徙而史志不之詳也又東逕扶柳縣故城南世祖

建武三十年封寇恂子損為侯國又東屈北逕信都縣

故城西信都郡治也漢高帝六年置景帝二年為廣川

惠王越國一清按劉敞曰景帝前二年初封王子彭祖為廣川王都信都四年徙趙國除為信都郡

中二年封王子越為廣川王傳國至王汝陽廢當甘露

四年也百官表成帝永始二年有信都太守是廣川國

除為郡矣後漢志劉昭註云安平故信都高帝置又志

云景帝增六郡若信都為高帝置則不及此數疑當

二年復為廣川國宣帝甘露四年復故郡中王莽更為

新博縣曰新博亭光武自薊至信都是也明帝永平十

五年更名樂成一清按漢志作樂安誤也當以續志酈注正之安帝延光中改

曰安平城內有漢冀州從事安平趙徵碑又有魏冀州

刺史陳畱丁紹碑青龍三年立一清按丁紹見晉書良吏傳在惠帝之末去魏

代已遠寰宇記冀州信都縣下引郡國縣道記亦云信

都城內有曹魏冀州刺史陳畱丁紹頌德碑青龍三年

立疑別城一人城南有獻文帝南巡碑其水側城北注又北逕

安陽城東又北逕武陽城東十三州志曰扶柳縣東北

有武陽城故縣也又北為博廣池池多名蟹佳蝦歲貢

王朝以充膳府又北逕下博縣故城東而北流注于衡

水也

又東北過扶柳縣北又東北過信都縣西

扶柳縣故城在信都城西衡水逕其西縣有扶澤澤中

多柳故曰扶柳也一清按漢志註此是闕駟說衡水又北逕昌成縣

故城西地理志曰信都有昌成縣漢武帝以封城陽頃

王子劉差為侯國一清按史表云昌侯劉差索隱曰志屬瑯琊漢表同而地理志信都國昌

成縣下云侯國王子侯表廣川繆王子節侯元以宣帝神爵三年封為昌成侯而瑯琊郡昌縣下無之道元誤

矣闕駟曰昌成本名阜成矣應劭曰堂陽縣北三十里

有昌成故縣也世祖之下堂陽昌成人劉植率宗親子

弟據邑以奉世祖是也又逕西梁縣故城東地理風俗

記曰扶柳縣西北五十里有西梁城故縣也世以為五

梁城蓋字狀致繆耳衡漳又東北逕桃縣故城北漢高

祖十二年封劉襄為侯國一清按史表云項氏親賜姓王莽改之曰

桓分也合斯浚故瀆斯浚水首受大白渠大白渠首受

綿蔓水綿蔓水上承桃水水出樂平郡之上艾縣東流

世謂之曰桃水東逕靖陽亭南故關城也又北流逕井

陘關下注澤發水太平寰宇記平定軍平定縣下云澤發水一名畢發水一名阜漿水一名

妒女泉郡國志云子推妹也水經注云澤發水逕董卓壘東今本無之亂流東北逕常山

蒲吾縣西而桃水出焉南逕蒲吾縣故城西又東南流

逕桑中縣故城北世謂之石勒城蓋趙氏增城之故擅

其目又謂之高功城也地理志曰侯國也一清按漢書王子侯表宣

帝地節二年封趙頃王子廣漢為桑中戴侯桃水又東南流逕綿蔓縣故城

北王莽之綿延也世祖建武二年封郭況為侯國自下

通謂之綿蔓水綿蔓水又東流逕樂陽縣故城西右合

井陘山水水出井陘山世謂之鹿泉水也東北流屈逕

陳餘壘西俗謂之故壁城昔在楚漢韓信東入餘拒之

於此不納左車之計悉衆西戰信遣奇兵自閒道出立

幟於其壘師奔失據遂死泚上其水又屈逕其壘南又

南逕城西東注綿蔓水全氏曰漢志常山郡元氏縣下

堂陽入橫河而水經無聞及讀郭氏山經注曰泚水今

出中邱窮泉谷乃悟泚水之誤爲沮水也一清按太平

寰宇記趙州臨城縣下引水經注云泚水東出房子城

西出白土細滑如膏可用濯綿色奪霜雪光彩鮮潔異

于常綿俗以爲美談言房子之曠也抑亦如蜀錦之得

濯江矣按御覽引此注云故歲貢其綿以充御用又縣

有百暢亭水經注云泚水東逕百暢亭又漢志常山郡

房子縣贊皇山石濟水所出東至慶陶入泚寰宇記鎮州石

陘山在西泚水一名童水引注水經云泚水出常山郡

邑縣下云泚水一名童水引注水經云泚水出常山郡

石邑縣又獲鹿縣下飛龍山引水經注云泚水東逕飛

龍山北是井陘口今又名土門又趙州平棘縣下引水

經云泚水又東逕平棘縣南有石橋跨水闊四十步長

五十步橋東有兩碑又石柱下引水經云平棘城南門

夾道有兩石柱翼路若闕焉泚水即泚水也泚水字近

致訛又九域志邢州古跡于言山引水經云泚水又東

南逕干言山邨詩云出宿于干飲餞于言是也趙州沃

州城引水經云沃水東至沃州城入于沃湖按魏書地

形志鉅鹿郡慶陶縣有沃州城又趙州有平州城引水

經云槐水又逕平山南按地形志趙郡房子縣有平州

城寰宇記平棘縣下引水經注云槐水出黃石山山海

經曰泚水東流注于彭水顧景范曰水經以爲一名槐

水者也又寰宇記趙州高邑縣下引水經注云漢章帝

北巡至高邑亦光武卽位于此有石壇壇有圭頭碑卽

帝所建章懷後漢書注引水經注曰亭有石壇壇有圭

頭碑其陰云常山相狄道馮龍所造壇廟之東枕道有

兩石翁仲相對焉凡綿蔓水又屈從城南俗名曰臨清

城非也地理志曰侯國矣

一清按王子侯表宣帝地節二年封趙頃王子說爲樂陽

侯繆王莽更之曰暢苗者也東觀漢書曰光武使鄧禹發

房子兵二千人以鈔期為偏將軍別攻真定宋子餘賊

拔樂陽稟肥壘者也綿蔓水又東逕烏子堰枝津出焉

一清按漢志太原郡上艾縣綿蔓水東至蒲吾入虜沱水而注略焉又東謂之大白渠地

理志所謂首受綿蔓水者也白渠水全氏曰漳水所入

猶斯浚之與浚不可混也今于常山之大有白渠有大白渠又東南逕關

縣故城北地理志曰常山之屬縣也又東為成郎河水

上有大梁謂之成郎橋又東逕耿鄉南世祖封前將軍

耿純為侯國世謂之宜安城又東逕宋子縣故城北又

謂之宋子河漢高帝八年封許惲為侯國王莽更名宜

子昔高漸離擊筑傭工自此入秦又東逕敬武縣故城

北按地理志曰鉅鹿之屬縣也漢元帝封女敬武公主

為湯沐邑闕駟十三州記曰楊氏縣北四十里有敬武

亭故縣也今其城實中小邑耳故俗名之曰敬武壘即

古邑也白渠水又東謂之斯浚水地理志曰大白渠東

南至下曲陽入斯浚河者也東分為二水枝津右出焉

東南流謂之百尺溝又東南逕和城北世謂之初邱城

非也漢高帝十一年封郎中公孫耳為侯國全氏曰和

所分鉅鹿之支郡見于東觀漢記在下曲陽一作戎而

常山別有禾成則公孫耳所封王莽更名鄙為禾成亭

是也是注上言敬武下言貫城是鉅鹿之和成非禾成也注引侯表繆矣又東南逕貫城西

漢高帝六年封呂博為侯國

一清按史表貫齊侯呂徐廣曰呂一作台漢表貫齊

侯合傳胡害是侯不姓呂而注云呂博豈字近合傳故耶

百尺溝東南散流逕歷鄉

東而南入泚湖東注衡水也斯浚水自枝津東逕貫城

北又東積而為陂謂之陽縻淵淵水左納白渠枝水俗

謂之祗水

朱氏箋曰李克家云疑作泚水

水承白渠於藁城縣之烏子

堰又東逕肥纍縣之故城南又東逕陳臺南臺甚寬廣

今上

全氏曰下有脫文

陽臺屯居之又東逕新豐城北按地理

志云鉅鹿有新市縣侯國也

一清按王子侯表元帝元鳳五年以封廣川繆王子

康侯吉功臣表景帝以封趙內史王棄之皆國于此

王莽更之曰樂市

一清按漢志分註作

市樂疑彼文誤

而無新豐之目所未詳矣

一清按史記趙世家悼襄王四年龐煖將

趙楚魏燕之銳師攻秦蕞不拔移攻齊取饒安徐廣曰

蕞在新豐饒安在勃海又云饒屬北海安屬平原此新

豐非咸陽之新豐今藁城縣東北有新豐城隋置新豐

縣屬鉅鹿郡蓋錄舊名蕞地無考漢表書王子侯有前

侯信濟北貞王子表云平原師古曰字或作蕞側流反

史記建元以來王子侯表前作蕞徐廣曰一作散字誤

也蓋即蕞字索隱曰蕞音緞亦以為其水又東逕昔陽

城南世謂之曰直陽城非也本鼓聚矣春秋左傳昭公

十五年晉荀吳帥師伐鮮虞圍鼓三月鼓人請降穆子

曰猶有食色不許軍吏曰獲城而弗取勤民而頓兵何

以事君穆子曰獲一邑而教民怠將焉用邑邑以賈怠

不如完舊賈怠無卒棄舊不祥鼓人能事其君我亦能

命而無二心不亦可乎鼓人告食竭力盡而後取之克
鼓而返不戮一人以鼓子鳶鞮歸既獻而返之鼓子又
叛荀吳略東陽使師偽糴負甲息于門外襲而滅之以
鼓子鳶鞮歸使涉佗守之者也十三州志曰今其城昔
陽亭是矣京相璠曰白狄之別也下曲陽有鼓聚故鼓
子國也一清按顧氏日知錄曰水經注一卷昔陽城兩
見一在下曲陽一在沾縣誤也方輿紀要云晉
州昔陽亭在州東南應劭曰下曲陽有鼓聚昔陽亭左
傳昭公二十二年鼓叛晉荀吳略東陽使師偽糴者
負甲以息于昔陽之門外遂襲克之此鼓子所都之昔
陽也又有昔陽城為肥子所都在今山西樂平縣東南
五十里左傳昭公十二年晉荀吳入昔陽滅肥以肥子
縣臯歸杜預曰樂平沾縣東有昔陽城此肥子所都之
昔陽也如紀要之云亦或異地而同名矣

白渠枝水又東逕下曲陽城北又

逕安鄉縣故城南地理志曰侯國也一清按王子侯表
元帝竟寧元年封

趙哀王子喜為安鄉孝侯是也又東逕貫縣入斯浚水又東逕

西梁城南又東北逕樂信縣故城南地理志曰鉅鹿屬

縣侯國也一清按王子侯表宣帝神爵三年
封廣川繆王子彊為樂信頃侯又東入衡

水一清按漢志真定國縣曼縣斯浚水首
受大白渠東至鄆入河蓋即衡水也衡水又北為

袁譚渡蓋譚自鄴往還所由故濟得厥名

又東北過下博縣之西

衡水又北逕鄆縣故城東竹書紀年梁惠成王三十年

秦封衛鞅于鄆改名曰商即此是也故王莽改曰秦聚

也地理風俗記曰縣北有鄆阜蓋縣氏之一清按後漢
書光武帝紀

注引竹書紀年云衛鞅封鄆續志鉅鹿郡鄆縣漢志作鄆師古曰音苦么反鄆字是鄆字之誤觀班志綿曼縣下分註作鄆可見若衛鞅封邑在宏農之商縣地理志云秦相衛鞅邑也史記秦本紀孝公二十二年封鞅為列侯號曰商君正義曰商州商洛縣又本傳正義曰於商在鄆州內鄉縣東七里古於邑也然則何得云在鉅鹿之地乎全氏曰蕭該誤音鄆為鄆臧矜又誤音為鄆按鄆是太原之邑鄆是鉅鹿之邑竝屬趙秦何由得取其地以封鞅乎王莽以鄆為秦聚固非道元謂莽以鄆為秦聚九繆蓋析縣之南鄉有鄆亭通武關見王莽傳即鄆奕招降析宰之處正商於之地豈鉅鹿之謂乎通典舊唐書作鄆寰宇記作鄆亦非

博縣故城西王莽改曰閏博應劭曰太山有博故此加

下章懷後漢注曰在博漢光武自呼沱南出至此失道

不知所以遇白衣老父曰信都郡為長安守去此八十

里世祖赴之任光開門納焉漢氏中興始基之矣尋求

老父不得議者以為神衡漳又東北歷下博城西逶迤

東北注謂之九崢一清按寰宇記引信都記云謂之西九崢曲即今衡水縣之鹽苦二河

逕樂鄉縣故城南王莽更之曰樂邱也又東引葭水注

之全氏曰漢志廣平國南和縣列葭水東入滹說文滹水出趙國襄國東入馮善長略滹不敘賴說文尚存其迹耳一清按漢書武五子燕刺王傳使人祠葭水台水晉灼曰葭音家寰宇記因作列家水也列葭水見漢志水經注作引葭水竊意引長也葭蘆也故變引葭為長蘆引之與列字形相似正可與班書參異同耳

又東北過阜城縣北又東北至昌亭與虜池河會

經敘阜城於下博之下昌亭之上考地非比於事為同

勃海阜城又在東昌之東故知非也全氏曰按此是後漢安平國之阜城

乃前漢信都國之昌成故注明其非勃海之阜城也而魏書地形志武邑郡阜城下云前漢屬勃海後漢屬安

平蓋合二縣而為一非也漳水又東北逕武邑郡南魏所置也又東

逕武強縣北又東北逕武隧縣故城南按史記秦破趙

將扈輒於武隧斬首十萬即於此處也王莽更名桓隧

矣白馬河注之水上承庫池東逕樂鄉縣北饒陽縣南

一清按章懷後漢書注曰呼沱河舊在饒陽南至魏太祖曹操因饒河故瀆決令北注新溝水所以今在饒陽

北又東南逕武邑郡北而東入衡水謂之交津口衡漳

又東逕武邑縣故城北王莽之順桓也晉武帝封子於

縣以為王國後分武邑武隧觀津為武邑郡治此一清按晉

志無武邑郡地形志云武邑郡晉武帝置又云魏所置注前後兩仍其說宜以此文為正也衡漳又

東北右合張平口故溝上承武強淵淵之西南側水有

武強縣故治故淵得其名焉東觀漢記曰光武拜王梁

為大司空以為侯國者宿云邑人有行於途者見一小

蛇疑其有靈持而養之名曰擔生長而吞噬人里中患

之遂捕繫獄擔生負而奔邑淪為湖縣長及吏咸為魚

矣今縣治東北半里許落水淵水又東南結而為湖又

謂之郎君淵者宿又言縣淪之日其子東奔又陷於此

故淵得郎君之目矣淵水北通謂之石虎口又東北為

張平澤澤水所泛北決堤口謂之張刀溝北注衡河謂

之張平口亦曰張平溝水溢則南注水耗則輟流衡漳

又逕東昌縣故城北經所謂昌亭也王莽之田昌也俗

名之曰東相蓋相昌聲韻合故致茲誤矣西有昌城故
目是城為東昌矣衡漳又東北左會虜池故瀆謂之合

口一清按史記正義引水經曰漳水一名大漳水兼有
滌水之目也漢志魏郡武安縣瀆水東北至東昌入
虜沱河過郡五行六百一里師古曰瀆子衽反說文瀆
水出魏郡武安東入滹沱水从水寔聲寔籀文變字即
衡漳也又衡漳又東北分為二川當其水決處名之曰
謂之橫河

李聰渙

又東北至樂成陵縣別出北瀆一清按注云陵字是桓帝
所加此亦經文晚出之證

衡漳於縣無別出之瀆出縣北者乃虜池別水分虜池
故瀆之所纏絡也衡漳又東分為二水左出為向氏口
瀆水自此決入也衡漳又東逕弓高縣故城北漢高帝

封韓信兄子韓隤當為侯國沈氏曰漢表是文帝十六
年封信傳是十四年封非

高帝黃慎中本作景帝亦
非且是信孽子非兄子也王莽之樂成亭也一清按漢
志河閒國

分註莽改樂成為陸信弓高為樂
成今本落亭字當以水經注補之衡漳又東北右合柏

梁澁水上承李聰渙東北為柏梁澁東逕蒲領縣故城

南漢武帝元朔三年封廣川王一清按王子
侯表是惠王子子劉嘉為

侯國地理風俗記云修縣西北八十里有蒲領鄉故縣

也太平寰宇記阜城縣下云故蒲領城水經云今滄州
魯城縣東北六十里漳河西岸又有北蒲領故城蓋
因漢末黃巾之亂有蒲領人流
寓于彼遂立此城今本無之又東北會桑社枝津又

東北逕弓高城北又東注衡漳謂之柏梁口衡漳又東
北右會桑社溝溝上承從陂世稱盧達從薄亦謂之訶

摩河

一清按此即漢志代郡鹵城縣下之從河也訶東摩當作摩訶梵語謂大為摩訶蓋言大河也

南通清河西北達衡水春秋雨泛漳澤津渚今觀津城

北方二十里盡為澤藪蓋水所鍾也其瀆逕觀津縣故

城北樂毅自燕降趙封之於此邑號望諸君王莽之朔

定亭也又南屈東逕竇氏青山南側隄東出青山即漢

文帝竇后父少翁冢也翁即是縣人

一清按唐書宰相世系表竇建德傳

竇后父安成侯充今誤本水經注作少消寰宇記引隋圖經作后父青舊唐書竇建德傳遣使往灌津祠竇青

之墓青是其名消乃青之誤文而下云民號青山或山以人名受氏也

遭秦之亂漁釣隱

身墜淵而死景帝立后遣使者填以葬父起大墳於觀

津城東南故民號曰青山也又東逕董仲舒廟南仲舒

廣川人也世猶謂之董府君祠春秋禱祭不輟舊瀆又

東逕修市縣故城北漢宣帝本始四年封清河綱王子

劉寅為侯國王莽更之曰居寧也俗謂之溫城非也地

理風俗記曰修縣西北二十里有修市城故縣也又東

會從陂陂水南北十里東西六十步子午潭漲淵而不

流亦謂之桑社淵從陂南出夾隄東派逕修縣故城北

東合清漳漳泛則北注澤盛則南播津流上下互相逕

通從陂北出東北分為二一川北逕弓高城西而北注

柏梁澁一川東逕弓高城南又東北陽津溝水出焉左

瀆北入衡漳謂之陽津口衡水東逕阜城縣故城北樂

水經注

成縣故城南河間郡治地理志曰故趙也漢文帝二年別為國應劭曰在兩河之間也景帝九年封子德為河閒王是為獻王王莽更名郡曰朔定縣曰陸信褚先生曰漢宣帝地節三年封大將軍霍光兄子山為侯國也一清按此是褚表之繆而道元誤承之者褚先生云樂成侯霍山索隱曰表在平氏志屬南陽今按漢表霍山封樂平非樂成也表云東郡後褚先生又云樂平侯許翁孫而小司馬無說漢表許延壽封樂成侯翁孫疑是延壽字故表云平氏平氏樂成均屬南陽郡南陽之樂成其地無考大約與平氏相近地理志南陽樂成下云侯國而河閒國之樂成無說則非列侯食邑可知第褚少孫去宣帝世不遠不應參錯乃爾抑或後人傳寫之誤使兩家封邑對換一字道元引之小司馬釋之均未細覈班書耳然班固于霍山樂平封邑下云東郡地理志東郡清縣顏師古註引應劭曰章帝更名樂平則何以宣帝時即有此封不可曉也互見漯水篇漢章

帝封子開於此漢桓帝追尊祖父孝王開為孝穆皇以其邑奉山陵故加陵曰樂成陵也今城中有故池方八十步舊引衡水北入城注池池北對層臺基隍荒蕪示存古意也

又東北過成平縣南合清河

衡漳又東逕建成縣故城南按地理志故屬勃海郡褚

先生曰漢宣帝五鳳三年封丞相黃霸為侯國也全氏曰按

本表曰沛而善成平縣故城在北漢武帝元朔三年封

河閒獻王子劉禮為侯國一清按索隱曰表在南皮今漢表作平城侯禮又不云在

南皮皆為王莽之澤亭也城南北相直衡漳又東右會

陽津溝水自溝水東逕阜城南地理志勃海有阜城縣

王莽更名吾城者也非經所謂阜城也建武十五年世

祖更封大司馬王梁為侯國陽津溝水又東北逕建成

縣左入衡水謂之陽津口衡漳又東左會虜池別河故

瀆一清按漢志勃海郡成平縣下云滹沱河民曰徒駭

又河間國樂成縣虜沱別水首受虜沱河東至東光

入虜沱河又弓高縣下云滹沱別河首受滹沱河東至

平舒入海代郡鹵城下云虜沱河東至參合入虜沱別

按別下脫水字以漢志又東北合清河謂之合口又逕

註并水經驗之可證也南皮縣之北皮亭而東北逕浮陽縣西浮水東北注之

又東北過章武縣西又東北過平舒縣南東入海

清漳自章武縣故城西故濊邑也枝瀆出焉謂之濊水

東北逕參戶亭分為二瀆應劭曰平舒縣西南五十里

有參戶亭故縣也世謂之平虜城枝水又東注謂之蔡

伏溝又東積而為淀一水逕亭北又逕東平舒縣故城

南代郡有平舒城故加東地理志曰勃海之屬縣也魏

土地記曰章武郡治故世以為章武故城非也又東北

分為二水一水右出為澱一水北注呼池謂之濊口與

清漳亂流而東注于海一清按漢志則濁漳自鄴以下

濁漳與漢志戾至此忽敘入清漳蓋欲應漢志濁漳入

清漳清漳入河之說然不云入河而云入海是又與漢

志異今清漳注尾又缺而無以辨之清漳水出上黨沾縣西北少山大壘谷南過縣西又從縣

南屈

淮南子曰清漳出謁戾山高誘曰山在沾縣今清漳出

沾縣故城東北俗謂之漳山漢分沾縣為樂平郡治沾

縣水出樂平郡沾縣界故晉太康地記曰樂平縣舊名

清漳漢之故名矣其山亦曰鹿谷山水出大要谷南流

逕沾縣故城東不歷其西也又南逕昔陽城左傳昭公

十二年晉荀吳偽會齊師者假道於鮮虞遂入昔陽杜

預曰樂平沾縣東有昔陽城者是也全氏曰既云偽會

沾縣明矣杜既誤註而道元因之一清按昔陽有二此

本杜說然其事則大有可疑者據傳是晉荀吳偽會齊

師乘其無備也而入其國都是役也實滅肥傳故申之

曰晉伐鮮虞因肥之役也入昔陽是一事滅肥又一事

至昭二十二年負甲息于昔陽之門外遂滅鼓此與假

途滅號事絕相類昔陽非肥國都宜在鉅鹿之下曲陽

不應在上黨之沾縣也道元蓋襲杜註而不知之察耳願

棟高春秋大事表杜註正譌曰昭十二年傳晉荀吳偽

會齊師者假道于鮮虞遂入昔陽秋八月壬午滅肥杜

註鮮虞在中山新市縣昔陽肥國都樂平沾縣東有昔

陽城又云鉅鹿下曲陽縣西有肥累城高氏曰漢沾縣

屬上黨郡晉屬樂平郡地在太行之東去中山絕遠劉

炫駁杜曰齊在晉東偽會齊師當自晉而東行假道鮮

虞遂入昔陽則昔陽在鮮虞之東明矣樂平沾縣在中

水經

卷十

東潛趙氏定本

乖于滅鼓之傳今案前後漢志及水經注所再皆同劉說當從之案高氏此論極為精細肥國都當以杜註鉅鹿下曲陽為是樂平沾縣之說非也劉炫云鼓都在真定府晉州治即隋鼓城縣開皇十八年以昔陽縣改置是知昔陽為鼓都非肥都也肥都在真定府藁城縣西南七里魏收志藁城有肥累城即杜註鉅鹿下曲陽之肥累城也若沾縣之昔陽乃在今山西平定州樂平縣東五十里俗呼夕陽城相去絕遠矣其水又南得梁榆水口水出梁榆城西大嶧山水有二源北水東南流逕其城東南注于南水南水亦出西山東逕文當城北又東北逕梁榆城南即闕與故城也秦伐韓闕與惠文王使趙奢救之奢納許歷之說破秦于闕與謂此也司馬彪袁山松郡國志竝言涅縣有闕與聚盧諶征艱賦曰訪梁榆之虛郭弔闕與之舊都袁豹亦云闕

與今梁榆城是也漢高帝八年封馮解散為闕氏侯國全氏曰闕氏非闕與侯表有誤文索隱曰在安定亦非一清按史漢表之闕氏索隱以為安定蓋即地理志安定郡之烏氏縣也續志作烏枝古篆文烏與於相似後人又加一門疑馮解散之封宜在彼全氏以小司馬為非未之審耳其水右合北水北水又東南入于清漳清漳又東南與轅水相得轅水出轅河縣西北轅山南流逕轅

河縣故城西南東流至粟城注于清漳也初學記儀州下引水經注

日黃崑水出遼山縣西黃岡下寰宇記遼州遼山縣下引注水經云清谷口水源出東北長山清谷亦云縣西南黃巖山轅水出也今本無之一清按遼山當作轅陽河東圖云漢為涅縣地後漢于此置陽阿縣俱屬上黨郡晉改為轅陽縣屬樂平郡後魏太武併八武鄉明帝改轅陽為遼陽隋初改置遼山縣屬并州因縣西北轅山為名注中轅河之名不知何昉遼陽水從平城縣西北八賦嶺下出名八賦水經遼陽城名遼陽又東合

清漳為漳水也元和志云後漢於此置轄河縣今續志無之

東過沙縣西屈從縣南

一清按兩漢志本作沙縣至三國時始有涉名魏書云太祖圍鄴涉

長梁岐以縣降是也

按地理志云魏郡之屬縣也漳水於此有涉河之稱蓋

名因地變也

東至武安縣南黍窖邑入于濁漳

朱氏謀瑋箋曰謝云此下疑脫注

補滏水

山海經北山經曰又北三百里曰神菌之山滏水出焉而東流注于歐水御覽引水經注滏水發源出石鼓山南巖下泉源奮涌若滏之揚湯矣其水冬溫夏冷崖上

有魏世所立銘水上有祠能興雲雨又東流注于漳謂之合河又曰水經注云浮圖澄別傳曰石虎時自正月不雨至六月澄日詣滏祠稽首暴露即日二白龍降於祠下于是雨徧千里劉昭郡國志補註引水經鄴西北滏水熱故名滏口滏亦合漳之大川也

補滏水

初學記邢州下引水經注曰滏水一名漳水俗名千步

又水經注曰滏水東逕柏暢亭又滏州下引水經注曰

狗山頂上有狗迹今在臨滏縣西又水經注曰滏水東

北逕廣平縣故城東水積于大澤之中為澄南北四

十里東西二十里亦謂之黃塘泉寰宇記磁武安縣
 下引水經注云洛水出易陽縣西山洛州永年縣下云
 風土記云南易水本名漳水源出三門山西自肥鄉縣
 界流入趙地記云六國時此水名易水埤蒼及水經云
 洛水之目不知誰改俗謂山之下地名洛水因經之故
 曰洛水九域志邠州古跡引水經云洛水東流逕曲梁
 城按曲梁城見漳水篇列入縣注中蓋清濁二漳會流
 于滹池斯有洛水之目今文絕無此水然蛛絲馬跡猶
 可尋求也

水經注釋卷十終

水經注釋卷十終

卷之三